

Süchiki tü

ALATEETKAT MAPEENA

Tü nüshajakat achiki Juan

1 ¹Anuu tü tashajakat, taya Juankai anülia, süchiki tü kasa alatajatkat maalü ee'iyatünakat tamüin nütüma wane aapiee nüma'anajeejachi Maleiwa ajütünakai tanainmüin nütüma Jesucristo. Ee'iyatünüsü shia paala nümüin Jesucristo nütüma Maleiwa süpüla nüküjirüinjatüin namüin na anoujashiikana nünain. ²Tashaja achikit süpüshua tü te'rakat, maa aka soo'opünaa nünüiki Maleiwa je soo'opünaa tü shiimüin nüküjakat tamüin Jesucristo. ³Anata'aleeshija'a ma'i chi wayuu eekai naashaje'erüin sümüin tü wayuukolüirua tü anuu tashajüin achiki sulu'u tü karalouktakat. Je anata'aleeshiija'a ma'i napüshua na oonookana sümaa tü pütchi naapakat. Süka jamüin, alü'ütsü joo sükalia süpüla keraainjatüin shia.

A'waajünüshi Jesucristo nütüma Juan

⁴Taya Juankai anülia, ashajüshi taya jümüin jiakana anoujashiikana nünain Jesucristo chakana sulu'u tü akaratshisükat outkajaalee sulu'u tü mmakat kanülüakat Asia. Achuntüshi taya jaa'u nümüin chi Maleiwakai süpüla nii'iyatüinjachin

na'anasia waneepia jümüin je süpüla naapüinjachin anaa jümüin. Shiimüin sünain een nia maa'ulu yaa, sünain eetüjülin nia nümäiwa, je sünain eenjachin nia waneepia süpüla ka'ikat süpüshua. Je achuntüshi taya jaa'u nümüin chi Naa'inkai Maleiwa, chi eekai nümaa sümülatu'u tü niinasekat chakat iipünaa eere nuluwataain, chi eekai jüma'aya wane'ewaie jukua chaa sulu'u tü akaratshisükat outkajaalee. ⁵Je achuntüshi taya jaa'u nümüin Jesucristo, chi lotokai akuaippa sünain aküjaa nünüiki chi Maleiwakai, chi palajachikai sünain oso'irawaa aa'in süchikijee ouktaa, chi mülo'ushikai napüleerua napüshua na sülaülashiikana mma.

Anakaja wa'waajüle Jesucristo, süka alin ma'i waya nüpüla, je süka taashiinapain waya nütüma sünainjee ouktüin nia waa'ujee suulia süsalajüin waya waainjala. ⁶Anakaja wa'waajüle nia, süka ni'itaain waya wane'ewaie wakua süpüla a'yatawaa nümüin Maleiwa chi Nüshikai aluwataakai waa'u. E'itaaushi waya nütüma süpüla akaalinjaa na anoujashiikana sünain a'waajaa chi Maleiwakai. Kasataalejese kojutüinjachin Jesucristo sütüma wayuu wainma

süpüla ka'ikat süpüshua, süka
laülaain nia saa'u kasa süpüshua.
Amén, anakaja wa'waajüle nia.

⁷ Anteechi Jesucristo nüchikua
sa'aka tü sirumakat.

E'nneechi sütüma wayuu
süpüshua.

Otta ne'reechi nia na
noo'uliwo'ukana na wayuu
o'utakana naa'in paala.

Je so'uweena ka'ikat tia,
a'yalajeerü ma'i sümaa
mmoluu tü wayuukolüirua
sainküin mmakat süpüshua.

Amén. Shiimüin sünain
nüntajachin nüchikua.

⁸ Je nüniiki chi Maleiwa
Aluwataakai, müsü mayaa: “Taya
kakumalaka kasa süpüshua, taya
ekeraajaka'aya shia. Taya chi
Pülashikai ma'i. Eeshi taya maa'ulu
yaa, eetüjü'iyaa taya tamaiwa, je
eeinjachi taya waneepia süpüla
ka'ikat süpüshua”.

**Aluwataanüshi Juan sünain
ashajaa tü ni'rakat**

⁹ Taya Juan chi juwalakai,
wanaawajiraasü takuaippa jümaa
sünain waluwataaushin nütüma
Maleiwa je sünain wachecherüin
waa'in su'unnaa tü müliaa we'rakat
saaliijee wanoujain nünain Jesús.
Taküjainjatü joolu'u jümüin tü
te'rakat wanaa sümaa püreesain
taya chaa sulu'u wane mma
kanüliasü Patmos pasanainkat
sünain palaa. Püreesashi taya
saaliijee tanoujain nüniiki Maleiwa
je saaliijee aküjaa sümüin wayuu
sünain niain Jesús Tasenyotsein.

¹⁰ Je so'u wane ka'i riminko,
na'anaain taya chi Naa'inkai
Maleiwa. Taapakalaka joo nüniiki
wane wayuu yaa tapücho'ujee

sünain emetuluin ma'i, müsü aka
saa'in shi'ira konneeta, ¹¹ sünain
nümiin tamüin: “Tü pi'reetkat
joolu'u, anakaja müleka püshajüle
shia sulu'u wane karaloukta süpüla
püjütüinjatüin shia sümüin tü
anoujasükalüirua tanain sulu'u tü
akaratshisükat outkajaalee chakat
sulu'u tü pueulokalüirua:

Éfeso,
Esmirna,
Pérgamo,
Tiatira,
Sardis,
Filadelfia, je
Laodicea”.

¹² Ojununtaashi joo taya süpüla
tatüjaainjachin naa'u jaralin chi
aashajaakai tamaa. Te'rakalaka
akaratshisü rampara oorole'eya
sütoutajee. ¹³ Je pasanain sünain
tü ramparakalüirua, te'rakalaka
wane müshi aka saa'in wayuu.
Kashe'inyouleshi nia. Je
nuluuwainpünaa, eesü wane
kuluulu oorole'eya. ¹⁴ Je müsia
nu'wala, kasuushaatasü ma'i. Otta
no'u, müsü aka saa'in süchuwala
siki. ¹⁵ Je tü nuu'uiikat, müsü aka
saa'in paira eekai eeroloujuushin.
Otta tü nüniikikat, emetutsü ma'i
maa aka saa'in su'lotüin palaa.
¹⁶ Je najapulu'u yaa nikialu'ujee,
eesü akaratshisü jolotsü. Otta
naanükülu'ujee, ojuittüsü wane
chajaruuta piama asalü, kasasü
ma'i. Otta nu'upünaa, müsü aka
nuchuwala chi ka'ikai sütsüinru'upa.

¹⁷ Je te'rapa nia, müichipa aka
taya saa'in wayuu ouktüsü palastüin
yaa nümülatu'u. Ni'itaakalaka
tü najapü nikiakat taa'u sünain
maa tamüin: “Nnojo mmolüin pia.
Eetüjü'iyaa taya süpülapünaa kasakat
süpüshua je eeinjachi taya meinshi.

¹⁸Taya kataka atüma so'u wayuu. Mayaashije ouktüin taya paala, anii taya pi'rüin sünnain katüin to'u je ayateechi taya katüin o'u süpüla ka'ikat süpüshua. Eesü tama'ana tü shiyaaweinkat tü Hadeskat tü süpüleekat tü ouktüsükalüürua.

¹⁹“Pi'reerü joolu'u tü alatajatkat maa'ulu yaa je tü alateetkat mapeena. Anakaja müleka püshajüle shia. ²⁰Taküjeerü joolu'u pümüin tü nnojotkat sütüjaain aa'u wayuu paala soo'opünaa kasain kayaawasein tü akaratshisü jolotsü pi'rakat sulu'u tü tajapü tekiakat je kasain kayaawasein tü akaratshisükat rampara: Tü akaratshisükat rampara, shiyaawase tü akaratshisükat outkajaalee. Je tü akaratshisükat jolotsü, nayaawase na akaratsshishiikana aapiee aa'inmajakana tü anoujasükalüürua sulu'u tia outkajaaleekalüürua.

**Tü karaloukta sümüinjatkat
tü anoujasükalüürua**

chakat Éfeso

2 ¹“Püshaja nümüin chi aapiee aa'inmajakai tü anoujasükalüürua tanain sulu'u tü outkajaaleekat chakat sulu'u tü pueulokat Éfeso:

“Anuu nünüiki chi kajapulu'ukai tü akaratshisükat jolotsü nikialu'u, chi sa'akakai waneepia tü akaratshisükat rampara: ²Tatüjaa aa'uchii jia anoujashiikana chakana Éfeso sünnain jaa'inrüin kasa eekai anain. Ta'waajüin jia süka jüchecherüin jaa'in sünnain aa'yatawaa tamüin. Tatüjaa aa'uchii jia sünnain jüünajaain jüma'anajee chi eekai

kama'üralin. Kayaawaseshii jia namüin na antakana ja'akamüin süpüla ekirajaa nünüiki Maleiwa naashin sünnain nnojolüin shiimüin aluwataaushin tatüma. ³Sotüsü taa'in sünnain jüchecherüin jaa'in su'unnaa tü müliaa ji'rakat saaliijee tü jünoulakat tanain. Mayaainje müliain jia, ayatshi'iyaa jia ichein tanain.

⁴“Akaajaa tachiajaaka oulia jia, shia sünnain nnojoliin alin jüpüla na juwalayuukana maa aka alin jüpüla naya paalainka jikeroloiwa'aya sünnain anoujaa tanain. ⁵Soto jaa'in anapü'üin ma'i jukuaiippa namüin na juwalayuukana. Anakaja joolu'u müleka juu'ulaale suulia maalin naya jüpüla sümaa jaa'inrüinjatüin jüchikua tü kasa anasü jaa'inrapü'ukat namüin. Akaajasa nnojorule jaa'inrüin, antamaateechi taya süpüla taakatüinjatüin ja'akajee tü ramparakat aapünakat paala jümüin. ⁶Otta mayaashijee tachiajaainapain jia, sotüsü taa'in sünnain jiyouktüin wanaa tamaa tü naa'inrakat na nikirajüinkana Nicolás, na wayuu ekirajüliikana sünnain alawaa.

⁷“Müleka kapürale jaa'in tanüiki, anasü jülüjüle jaa'in tü nümakat joolu'u chi Naa'inkai Maleiwa jümüin jia anoujashiikana sulu'u tü outkajaaleekalüürua süpüshua. Je chi eekai nükanajuuin chi Kama'üraikai nütüma, te'itaajeechi nia süpüla nikiünjatüin süchon tü wunu'u sulu'ukot tü na'apainsekai

Maleiwa, tü süchon katakat
atüma so'u wayuu.

**Tü karaloukta sümüinjatkat
tü anoujasükalüürua**

chakat Esmirna

⁸“Püshaja nümüin chi aapiee
aa'inmajakai tü anoujasükalüürua
tanain sulu'u tü outkajaaleekat
chakat sulu'u tü pueulokat Esmirna:

“Anuu nünüiki chi eetüjüika'iya
süpülapünaa kasakat süpüshua,
chi eenjachikai meinshi, chi
ouktakai paala süna'in süso'iraain
naa'in süchikijee: ⁹Tatüjaa aa'uchii
jia süna'in mülia'in ma'i maa'ulu
yaa je süna'in wayuuin mojushii
jia. Otta soto jaa'in süna'in
wayuuin anashii jia nu'upala
Maleiwa. Je tatüjaa aa'uchii jia
süna'in mojuin sünüiki wayuu
jümüin. Na wayuu, nüpüshikana
Maleiwa naajüin. Na'alainpaja'a
ne'e shia, aluwataaushi ne'e
nütüma Satanás. ¹⁰Nnojo mmolüin
jia seema tü müliaa anteetkat
jünainmüin maalü. Tamüshii paala
jia: Eejeena eekai nata'ünneenain
ja'akajee süpüla püreesain
nütüma chi Yolujaakai süpüla
nüpüleeruain jaa'in shii'iree
jyyouktüin taya. Ji'reerü müliaa
süpüla poloo ka'i. Otta jia kana,
mayaasüje su'utinüin naa'in
waneerua ja'akajee süna'injee tü
nanoulakat, anakaja jüchecherüle
jaa'in jüpüshua süna'in anoujaa
waneepia. Soto jaa'in süna'in
juwalaajüneenain tattüma.
Teenakeena jia tanainmüin süpüla
eeinjanain jia waneepia nümaa
Maleiwa.

¹¹“Müleka kapitirale jaa'in
tanüiki, anasü jülüjüile jaa'in tü

nümakat joolu'u chi Naa'inkai
Maleiwa jümüin jia anoujashiikana
sulu'u tü outkajaaleekalüürua
süpüshua. Je chi eekai
nükanajuuin chi Kama'üraikai
nütüma, ja'itaichi ouktüin maa
aka wayuu süpüshua, nnojoleechi
akatalaain nuulia Maleiwa
süchikijee.

**Tü karaloukta sümüinjatkat
tü anoujasükalüürua**

chakat Pérgamo

¹²“Püshaja nümüin chi aapiee
aa'inmajakai tü anoujasükalüürua
tanain sulu'u tü outkajaaleekat
chakat sulu'u tü pueulokat Pérgamo:

“Anuu nünüiki chi kama'anakai
tü chajaruuta piamakat süsa
kasakat ma'i: ¹³Tatüjaa aa'uchii
jia süna'in kepiain cha'aya sulu'u
tü pueulo eere nuluwataain
Satanás saa'u wayuu sainküin
mma. Ja'itasü kaainjalain wayuu
wainma cha'aya, ayatshi'iya jia
süna'in anoujaa tanain. Sotüsü
taa'in wanaa sümaa nu'utinüin
aa'in cha'aya chi juwalakai
Antipas, chi aküjapü'ükai tanüiki
meinshi. Mayaashiije mmolüin jia
wanaa sümaa tia, nnojoliishii jia
oo'ulaain toulia.

¹⁴“Akaajaa tachiajaaka oulia
jia, shia süna'injee sa'aleewajaain
waneerua ja'aka namaa na
oushikajaakana süchiirua tü
nikirajapü'ükat achiki Balaam, chi
ekirajakai süna'in alawaa sümaiwa
paala wanaa sümaa nuluwataain
Balac. Balaam, nii'iyatüin nümüin
Balac tü naa'inrüinjatkat süpüla
kaainjalainjanain na wayuu
Israelkana nuulia Maleiwa.
Je Balac, nimeejakalaka na

Israelkana süpüla neküinjatüin tü asalaa aapünakat paala sümüin tü maleiwayaasükalüürua, je süpüla a'luwajirawaa akuaiippaa sümaa wayuu jierü otta wane jierü nümaa wane toolo.

¹⁵Otta wane tachiajaaka oulia jia, shia sünainjee sa'aleewajaain waneerua ja'aka namaa na nikirajüinkana Nicolás, na ekirajüliikana sünain alawaa.

¹⁶Jiyaawajaa jümata suulia kapülaa aa'in tü nekirajakat anain. Müleka nnojoliire jiyaawajaain suulia tia, antamaateechi taya jünainmüin süpüla tatkaainjachin jümaa süka tü chajaruuta tawaralu'ukot.

¹⁷“Müleka kapürale jaa'in tanüiki, anasü jülüjüle jaa'in tü nümakat joolu'u chi Naa'inkai Maleiwa jümüin jia anoujashiikana sulu'u tü outkajaaleekalüürua süpüshua. Je chi eekai nükanajuuin chi Kama'üraikai nütüma, taapeerü nüümüin süpüshi tü eküülü kanüliakat maná, tü anujunnakat paala sümaiwa. Je taapeerü nüümüin wane ipachon kasuutat ashajünakat anain wane anüliee jeket atüjaanakat aa'u nütüma ne'e chi aapünakai amüin.

**Tü karaloukta sümüinjatkat
tü anoujasükalüürua**

chakat Tiatira

¹⁸“Püshaja nüümüin chi aapiee aa'inmajakai tü anoujasükalüürua tanain sulu'u tü outkajaaleekat chakat sulu'u tü pueulokat Tiatira:

“Anuu nüüüiki chi Nüchonkai Maleiwa, chi kachuwalakai o'u, chi jorottokai oo'ui. ¹⁹Tatüjaa aa'uchii jia sünain jaa'inrüin tü

kasa anasükat sümüin wayuu sünain alin shia jüpüla. Süka ichein jia tanain, koo'omüinsü joo tü kasa anasü jaa'inrakat sünain ji'yataain tamüin suulia paala jikeroloiwa'aya sünain anoujaa tanain. Je joolu'u, mayaainje müliain jia, jüchecherüin jaa'in su'unnaa tia.

²⁰“Akaajaa tachiajaaka oulia jia, shia süka nnojoliün jüleejüin Jezabel, tü jierü aktüjatkat alawaa, tü nüüüikimaajatkat Maleiwa saashin. Shime'aja aa'inchii na anoujashiikana tanain süka tü alawaa shikirajakat anain süpüla kaainjalainjanain naya, maa aka na'luwajiraain nakuaippa sümaa wayuu jierü otta wane jierü nümaa wane toolo, je maa aka neküin tü asalaa aapünakat paala sümüin tü maleiwayaasükalüürua. ²¹Watta süma'a ta'atapajüin shia shii'iree suu'ulaweein suulia kaainjalaa. Ayouktajaasia ne'e. Ayatsia shia wayuuin maa'insat. ²²Tajüteerü wane ayuulii sünainmüin süpüla müliainjatüin shia saaliijee shiyouktüin taya. Je na wayuu aa'inrakana tü kasa mojusü saa'inrakat tü jietkat, müleka nnojorule noo'ulaain suulia naainjala, meena aka tatüma saa'in tü jietkat sünain müliashaatain. ²³To'uteena aa'in napüshua na eekai masütaajuin sünain naa'inrüin tü shikirajakat anain. Je na anoujashiikana sulu'u tü outkajaaleekat süpüshua, natüjaweekikalaka taa'u sünain nnojoliün sunujulaain saainjala wayuu toulia süka te'raajüin saa'in wayuu süpüshua süpüla süsalainjatüin saainjala tatüma.

²⁴“Taashajaain joolu'u jümüin jiakana chakana Tiatira

nnojoliikana oonooiin sümaa tü alawaa shikirajakat anain Jezabel, jiakana nnojoliikana ashatüin tü kasa mojusü nii'iyatakat Satanás sümüin wayuu, tü 'kasa anasükat' naajüin na ashatakana shia. Nnojoleerü koo'omüin joolu'u tatüma jümüin tü taluwataakat anain jia. ²⁵Shia tamaka ne'e jümüin tüü. Otta tacheküin jüpüleerua ayatüin katsüin jünoula waneepia süma'inru'u ja'atapajüin tale'ejüin tachikua.

²⁶“Je chi eekai nükanajuuin chi Kama'üraikai nütüma sümaa ayatüin naa'inrüin tü tachekekak nüpüleerua süntaleepa'a sükalia tü saja'lajaainjatkat o'u kasakat süpüshua, laülaajeechi nia tatüma saa'u wayuu sainküin mmakat süpüshua, ²⁷maa aka ni'itaain taya chi Tashikai süpüla laülawaa sünnain nümüin tamüin:

‘Te'itaain pia süpüla
aluwatawaa saa'u wayuu
süpüshua
sünnain me'rujuinjachin amüin
pia.

Eekai shi'rüin pümüin su'unnaa puluwataain,
asaichijaweerü pütüma maa
aka saa'in amüchi eekai
süsöttüin’.

²⁸Je so'u tia süpüla sütüjaainjatüin wayuu saa'u sünnain jükanajüichipain chi Kama'üraikai, taapeerü jümüin tü jolotsü eweetakat watta'a maalü. ²⁹Müleka kapüräle jaa'in tanüiki, anasü jülüjüle jaa'in tü nümakat joolu'u chi Naa'inkai Maleiwa jümüin jia anoujashiikana sulu'u tü outkajaaleekalüirua süpüshua.

Tü karaloukta sümüinjatkat tü anoujasükalüirua

chakat Sardis

3 ¹“Püshaja nümüin chi aapiee aa'inmajakai tü anoujasükalüirua tanain sulu'u tü outkajaaleekat chakat sulu'u tü pueulokat Sardis:

“Anuu nünüiki chi kajapul'uukai tü akaratshisükat jolotsü, chi eekai amaa chi Naa'inkai Maleiwa sulu'u tü akaratshisükat outkajaalee: E'nnaajünüshii jia sütüma wayuu sünnain wayuuin yalayatshii je sünnain jaa'inrüin kasa anasü saashin. Otta tatüjaa aa'uchii jia sünnain wattain jaa'in toulia. ²Nnojotsü jikeraajüin tü ji'yataainkat no'ulu'u chi Tamaleiwasekai. Ee jümata jaa'in sünnain tü a'yatawaa e'itaanakat paala jümüin nütüma süpüla nnojolüin sümalajaain tü nüchekakat jüpüleerua. ³Soto jümata jaa'in tü pütchi shiimüin ekirajünakat anain jia. Juu'ulaa suulia mashapalaa aa'in sünnain ekeraajaa tü nüchekakat chi Maleiwakai jüpüleerua. Je joonoo jümaala jüchikua sümaa tü shiimüinkat. Akaajaa müleka nnojorule jiyaawajaain, antalaa meechi taya jünainmüin süpüla süsalainjanain jia tatüma. Maa aka matüjaajuuin naa'u joujaleechin nüntüin wane ka'ruwarai, akaweechia tayakai tantapa.

⁴“Otta tatüjaa aa'uchii sünnain een ja'aka cha'aya Sardis palit wayuu eekai nnojolüin yarüttüin naa'in nu'upala Maleiwa. Eejeena naya tamaa sünnain kasuuin ma'i nashe'in,

süka nekeraajüin tü nüchekakat Maleiwa napüleerua. ⁵Je chi eekai nükanajuuin chi Kama'ürakai nütüma, meechi aka naa'in na wayuu a'atakana tü ashe'inyüü kasuukat ma'i. Nnojoleerü tala'ajaain nüñülia sulu'ujee tü karaloukta kalu'ukot nanülia na wayuu ee'iranajaainapakana aa'in tatüma. Je so'uweena tü ka'ikat tasha'walaweechikat o'u nümülatu'u Maleiwa namaa na aapieekana, 'Te'raajüin chira wayuukai', meechi taya nümüin. ⁶Müleka kapürale jaa'in tanüiki, anasü jülüjüle jaa'in tü nümakat joolu'u chi Naa'inkai Maleiwa jümüin jia anoujashiikana sulu'u tü outkajaaleekalüirua süpüshua.

**Tü karaloukta sümüinjatkat
tü anoujasükalüirua**

chakat Filadelfia

⁷“Püshaja nümüin chi aapiee aa'inmajakai tü anoujasükalüirua tanain sulu'u tü outkajaaleekat chakat sulu'u tü pueulokat Filadelfia:

“Anuu nüñüiki chi Maainjalasaikai, chi aküjakai tü shiimüinkat, chi kama'anakai tü niyaaweinkat David süpüla nikerotirüinjanain namüiwa na anoujashiikana nüñainmüin Maleiwa. Na manoujainsaliikana, nnojoleena nikerotirüin. Otta na anoujashiikana, naya nikerotireenaka. ⁸Tatüjaa aa'uchii jia anoujashiikana süñain jaa'inrüin kasa eekai anain. Ja'itaina mojutüin jia tanainjee sütüma wayuu cha'aya, nnojoliishii jia aattajaain taa'u. Ayatshi'iya jia oonoon sümaa tanüiki. Tamüshii paala

jia: Jutatüsü tatüma ekerotoo nüñainmüin Maleiwa jüpüleerua je nnojoleena jia aleejünüin nütüma. ⁹Je nnojotsü motüin taa'in tü kasa mojusü naa'inrakat jümüin na wayuu aluwataaushikana nütüma Satanás. Judíokana naashin, nüpüshikana Maleiwa naashin. Na'alainpaja'a ne'e shia, nnojoliishii naya nüpüshin. Tantireena naya jünainmüin süpüla namülialaainjanain jümülatu'u süpüla nayaawatüin saa'u süñain alin jia tapüla.

¹⁰“Otta jiakana, süka joonoon sümaa tanüiki sümaa jüchekerüin jaa'in su'utpünaa tü kasa mojusü naa'inrakat na wayuukana jümüin, taa'inmajeena jia su'unnaa tü müliaa antajatkat süñainmüin tü wayuukolüirua süpüshua apüleeruainjatkat aa'in sainküin mmakat.

¹¹“Shiimüin süñain tale'ejeechin tachikua maalü. Ayata jia süñain katsüin jünoula. Jalia jia suulia süsütünüin juulia tü taapüinjatkat jümüin saa'u jükanajüin chi Kama'ürakai. ¹²Je chi eekai nükanajuuin chi Kama'ürakai nütüma, te'itaajeechi nia süpüla einjachin nümaa Maleiwa waneepia. Müichia mayu'laain nüma'anajee. Je süka nüpüshin nia chi Tamaleiwasekai, tashajeerü nüñülia nüñain. Je süka kepiainjachin nia sulu'u wane Jerusalén jeket, tashajeerü tü sünüliakat nüñain. Shia tü pueulo nuluwataakat alu'u Maleiwa, tü ashakateetkat maalü chajee iipünaajee nüma'anajee. Je süka nu'tte'ennüichipain tatüma, tashajeerü tü tanülia jeketkat nüna'inya. ¹³Müleka kapürale

jaa'in tanüiki, anasü jülüjüle jaa'in tü nümakat joolu'u chi Naa'inkai Maleiwa jümüin jia anoujashiikana sulu'u tü outkajaaleekalüirua süpüshua.

Tü karaloukta sümüinjatkat tü anoujasükalüirua

chakat Laodicea

¹⁴“Püshaja nümüin chi aapiee aa'inmajakai tü anoujasükalüirua tanain sulu'u tü outkajaaleekat chakat sulu'u tü pueulokat Laodicea:

“Anuu nünüiki chi kanülüikai Amén, chi lotokai akuaiippa sünain aküjaa tü shiimainkat nüchiki Maleiwa, chi nukumajakai anainjee kasakat süpüshua Maleiwa: ¹⁵Tatüjaa aa'ut sünain akulajaa'in ma'i jaa'in sünain a'yatawaa tamüin. Mayaasüje nnojolüin mojuin jünüiki tamüin, nnojoliishii jia yalayalain aa'in. Müleka nnojorule jücheküin süpüleerua yalayalain jia, anasüje saa'in tamüin müleka mojule jünüiki tamüin wwatuo'ushi.

¹⁶Shiimüin sünain jukulajaa'in ma'i aa'in. Je sünainjee müin ne'e jukuaiippa, mojushaatasü taa'in jütüma.

¹⁷“A'waataashii jia sulu'u juwashirüin sünain maa: 'Anaajaashii waya neerü wainma. Nnojotsü kasain che'ojaain wamüin', müshii jia. Tamüshii paala jia: ¿Jamüshiiikai jia nnojoliika'a jiyaawatüin saa'u jukuaiippa sünain wayuuin müliashaataashii jia no'ulu'u Maleiwa, sünain mojushaatain ma'i jaa'in maa aka saa'in wayuu eekai maletsein, eekai mo'uin je eekai mashe'in?

¹⁸Tachuntajatkalaka joo jümüin sünain jiyalajüinjanain toulia tü che'ojaakat ma'i jümüin. Je tü taapeetkat jümüin, meerü aka shia jümüin ooro ojojunakat süka siki süpüla sujuittajatüin tü shi'yarülakat. Meerü aka shia jümüin ashe'inyüü kasuutot ja'atajatkat suulia japülijain jia sütüma mashe'inyüü. Meerü aka shia jümüin wunu'u o'upinasee o'yotünakat sulu'u tü jo'u ma'ülasükat süpüla ko'uinjanain jia jüchikua.

¹⁹“Tachiajaain jia joolu'u süka alin jia tapüla. Je napüshua na aikana tapüla, kalio'ushii tatüma. Je sükajee tia, anakaja jiyaawajaale suulia kaainjalaa süpüla jiyataainjanain tamüin süka süpüshua jaa'in.

²⁰Jaapaja tanüiki, anii taya antiün jünainmüin maa aka tantakai jipialu'umüin. Müleka eere ja'aka eekai naapajeein tanüiki sümaa nikerotirüin taya, ekeroteechi taya nünainmüin süpüla tekaain nümaa sümaa wanaawajiraain waa'in.

²¹“Je chi eekai nükanajuuin chi Kama'üraikai nütüma, te'itaajeechi nia süpüla aluwatawaa wanaa tamaa, maa aka e'itaashin taya nütüma Maleiwa chi Tashikai süpüla aluwatawaa wanaa nüma'aya saa'ujee takanajüichipain chi Kama'üraikai.

²²Müleka kapürale jaa'in tanüiki, anasü jülüjüle jaa'in tü nümakat joolu'u chi Naa'inkai Maleiwa jümüin jia anoujashiikana sulu'u tü outkajaaleekalüirua süpüshua.

“Tü taküjaitpakat pümüin, püshajüinjatü sümüin tü anoujasükalüirua tanain sulu'ukat tü akaratshisü outkajaalee”, nümakalaka tamüin.

**Tü niinase Maleiwa chakat
iipünaa eere nuluwataain**

4 ¹Shiasa süchikijee kettaapa tatüma tü karaloukta ashajinnakat taya sümüin tü akaratshisükat outkajaalee, eirakaashi taya chaa iipünaamüin. Shii'iyataakalaka tamüin wane kasa maa aka saa'in so'u miichi jutatüin cha'aya eere Maleiwa. Je chi wayuu aashajaakai tamaa paala, chi makai aka saa'in shi'ira konneeta nünüiki, nümakalaka aa'in tamüin: “Jalaichi yaamüin, tee'iyataiwa pümüin tü alatajateetkat”. ²Shiasa mapa yaaulerü, na'anaain taya chi Naa'inkai Maleiwa. Shii'iyataakalaka tamüin chaa iipünaa wane einasee süpülajatü aluwatawaa, je eeshi chi Maleiwakai joyotüin saa'u. ³Chinatüshi nia maa aka saa'in tü kakuuna kanüliakat “jaspe” oo'ulaka “cornalina”. Je tü niinasekat, pasanainsü shia sünain wane kaspolüin jorottüsü ma'i, müsü aka saa'in tü kakuuna kanüliakat “esmeralda”. ⁴Je pasanaintaasü joo shia'aya sünain piama shikii pienchimüin einasee. Eeshii joyojoyolüin saa'u tü einaseekaliürüa piama shikii pienchimüin laülaayuu. Kasuujasü ma'i nashe'in. Otta sünain nekii wane'ewaie nakua, eesü wane kotse oorole'eya maa aka nakotse na sülaülakana mma. ⁵Je sünainjee tü niinasekat chi Maleiwakai, sümachetaakalaka shiyaa juya sümaa sütüttaain. Je joo sümülatu'u tü niinasekat, eesü akaratshisü rampara chuwachuwatsü. Tiairua, shia niyaawaseka'aya chi Naa'inkai Maleiwa sulu'ukai tü akaratshisükat outkajaalee. ⁶Je sümülatu'u tü niinasekat, eesü wane kasa jamatüin

müsü aka saa'in wüin sulu'u wane laa, jorottüsü ma'i maa aka saa'in wane rouya.

Je sü'ütpa'a tü niinasekat, eesü pienchisü kasa kato'ulu. Pasanainsü tü niinasekat sünain. Ko'uyaa müsüürüa süpüleeruajee je süchiürüajee. ⁷Wane, müshi aka saa'in kannajapüt. Je wane'e, müshi aka naa'in paa'a toolo. Otta nu'upünaa chi wane'e, müsü aka saa'in su'upünaa wayuu. Je joo chi wane'eya, müshi aka saa'in warulapai sünain waawataa.

⁸Katünayaa müshii naya maa aka saa'in sütüna wuchii. Aippiruasuüwai natüna wane'ewai nakua. Je ko'uyaa müsü'üya sütoutajee je sütü'ujee tü natünakat. Meemerüinsalii naya sünain ee'irajaa nümüin Maleiwa, chi joyotokai saa'u niinase. Ee'irajjüshii sa'wai je so'uka'i sünain namüin:

“Shiimüinshaata sünain
maainjalain chi Maleiwa
Aluwataakai Pülashikai ma'i.
Eetjü'üya nümawai, eeshi nia
maa'ulu yaa, je eenjachi
nia waneepia süpüla ka'ikat
süpüshua”.

⁹⁻¹⁰Mawaisü nee'irain na pienchishiikana kasa kato'uchii na'waajapa Maleiwa, chi joyotokai saa'u tü einaseekat, chi matüjainkai ouktaa. Je wanaa sümaa na'waajüin nia sümaa naapüin analu'ut nümüin, a'wachiraawaishii nümülatu'u Maleiwa na laülaayuu piamakana shikii pienchimüin je ne'ita'awalin tü nakotsekalüürüa nümülatu'u süpüla nee'iyatüin nujut nümüin sünain namüin nee'irainru'u:

¹¹“Maleiwakalee, wa'waajüin pia süka piainja'a ne'e piakai aluwataain waa'u.

Alana'aleeshia ma'i pia sünain
 anain je sünain pülashin,
 süka piainja'a kakumalain
 kasakat süpüshua sulu'u tü
 püchekakat paa'inyaka.
 Je ayatsüja'a shia waneepia
 maa'ulu yaa
 süka alejatüinja'a shia
 pütüma”.

**Chi Anneetchonkai
 e'itaaushikai süpüla**

eerulaa tü karalouktakat

5 ¹Te'rakalaka joo wane
 karaloukta apalapatuushi yaa
 sulu'u najapü nikiakat chi Maleiwa
 joyotokai saa'u tü einaseekat.
 Ashajuushi sulu'ujee je süsapo'ujee.
 Süttüsü shia süka akaratshitua
 shipekia. ²Je te'rakalaka wane
 aapiee pülashi ma'i sünain asakiraa
 emetut soo'opünaa tü karalouktakat:
 “¿Jarai e'itaanaka süpüla aakataa
 shipekia tü karalouktakat süpüla
 saashaje'ennajatüin?”, nümakalaka.
³Shiasa nnojyüikalaka jaralin
 e'itaaushin süpüla aakataa shipekia
 tü karalouktakat, ja'itakaja'a süpüla
 ne'e eirakawaa sümüin, nnojotsü
 cha'aya iipünaa, nnojotsü yaa
 mmalu'u, nnojotsü cha'aya suupünaa
 tü mmakat. ⁴Ta'yalajakalaka ma'i
 süka mojuin taa'in süka nnojyülin
 eeyaa'in chi aakatajachikai
 shipekia tü karalouktakat je süpüla
 eirakawaa sümüin. ⁵Niasa wane
 no'ulukuku na laülaayuu piamakana
 shikii pienchimüin, nümakalaka
 tamüin: “Nnojo pi'yalajüin. Anii
 Jesús, chi Kannajapüt münakai
 nuu'uliwo'ukai Judá, chi Pülashikai
 ma'i nuu'uliwo'ukai David. Nia
 e'itaaushika süpüla naakatüinjatüin
 tü akaratshisükat shipekia sümaa

neerülüinjatüin tü karalouktakat,
 süka niyamülüin süpüshua tü
 nü'ünüükaliüirua”.

⁶Te'rakalaka joolu'u Jesús, chi
 Anneetchonkai anülia, sünain
 müin aka nia saa'in wane anneerü
 eekai o'utuushiirüin aa'in.
 Sha'watüshi nia nü'ütpa'a Maleiwa
 joyotakai saa'u tü einaseekat,
 pasanainshi nanain na pienchishii
 kato'uchiikana je na laülaayukana.
 Je chi Anneetchonkai, akaratshisü
 nu'uwa je akaratshisü no'u. Tü
 akaratshisükat no'u, niyaawase
 chi Naa'inkai Maleiwa sulu'ukai
 tü akaratshisükat outkajaalee, chi
 ajütünakai süpa'apünaa mmakat
 süpüshua. ⁷Shiasa nürütkaakalaka
 joo chi Anneetchonkai süna'inmüin
 tü einaseekat sünain naapaain
 tü karaloukta najapulu'ukat
 nikialu'ujee chi joyotakai. ⁸Je
 naapaapa shia, a'wachiraashii na
 pienchishii kato'uchiikana oo'ulaka
 na piamakana shikii pienchimüin
 laülaayuu yaa nümülatu'u chi
 Anneetchonkai sünain nee'iyatüin
 nujut nümüin. Je najapulu'u
 na laülaayukana wane'ewai
 nakua, eesü wane “arpa” süpüla
 atalejünaa. Je eesü najapulu'u
 wane iita oorole'eya eere sa'ajünüin
 wane wunu'u jemeta eejut. Je
 tü sümüsainkat, shiyaawase
 naashajaala na anoujashiikana
 nümaa Maleiwa. ⁹Nee'irajakalaka
 joo wane jayeechi jeket nümüin:

“Anneetchonkalee, e'itaaushi pia
 süpüla paapaainjatüin tü
 karalouktakat
 sümaa paakatüinjatüin tü
 shipekiakat.

Süka jamüin, o'ütüna aa'inchi pia
 süpüla taashinjatüin wayuu
 suulia kaainjalaa

süpüla shi'rajiraainjatüün
nūmaa chi Maleiwakai.

Pu'tte'erüün wayuu suulia
saainjala sa'akajee
e'irukuukat süpüshua
sainküinjee mmakat
süpüshua,

¹⁰ süpüla shiajiraainjatüün sünain
a'yatawaa nümüün chi
Wamaleiwasekai,
maa aka na sacerdote
judiökana sünain
na'yataapü'üün nümüün.

Je na o'ttaashiikana, süläüleena
naya wayuu pütüma
sainküün mmakat”.

¹¹ Te'arakalaka wane aapieeirua
wattashaata ma'i saalii je taapüün
nee'irain. Pasanainsü nachiki
tü einaseekat je na pienchishii
kato'uchiikana je na läülaayuukana.

¹² Emetutsü ma'i nee'irain sünain maa:

“Anneetchonkalee, pia
o'utinnakai aa'in,
alana'aleeshija'a ma'i pia
sünain anain.

Wa'waajakalaka ma'i pia,
süka kekiin ma'i pia, pülashin
ma'i pia, washirüünya ma'i
pia nütüma Maleiwa”.

¹³ Taapakalaka joo sünüüki tü
aapieekalüürua chaa iipünaa je sünüüki
süpüshua tü wayuukolüürua, na
kato'uchiikana je na mmaapüshiikana,
otta shi'ira süpüshua tü kasa katakat
o'u sainküün mma je shiroku palaa.

Ee'irajüshii naya sünain maa:

“Anashi wa'waajüle chi joyotakai
saa'u tü einaseekat oo'ulaka
chi Anneetchonkai,
süka nalana'aleeinya ma'i
sünain pülashiin naya.
Kojutüinjana naya waneepia
watüma süpüla ka'ikat
süpüshua”.

¹⁴ Otta na pienchishii kato'uchiikana,
“Amén, anashii wa'waajüle naya”,
müshii. Je na läülaayuukana,
wachiwachitshii naya nümülatu'u
chi Anneetchonkai oo'ulaka
nümülatu'u chi joyotakai saa'u tü
einaseekat sünain na'waajüün naya.

Aakatinnüsü tü shipekiakalüürua

6 ¹⁻² Teirakaakalaka nümüün
chi Anneetchonkai wanaa
sümaa naakatüün tü palajatkat
shipekia süttakat atüma tü
karalouktakat. Taapakalaka joo
nünüüki waneeshia no'ulukku na
pienchishii kato'uchiikana sünain
emetuluin ma'i maa aka saa'in
sütürüla juya sünain maa: “Jalaichi”,
müshi nia. Eweeta müshia wane
ama kasuutai je wane wayuu naa'u.

Je chi naajuchikai, kajapulu'ushi
wane uraichi sümaa jatüürua.
Saapünakalaka joo nümüün chi
amaajuchikai wane kotse maa
aka nakotse na süläülakana mma.
Nuwate'etkalaka ma'i chajee
iipünaajee maa aka naa'in wane
surulaat eekai nüshutüinjachin saa'u
nü'ünüü süpüla nüyamülüünjatüün.

³ Je naakatapa chi Anneetchonkai
wane shipekiaya, taapüün joo
nünüüki chi wane'eya pienchishii
kato'uchiikana: “Jalaichi”, müshi nia.

⁴ Nujuittakalaka joo wane ama'aya,
ishotoi ma'i. Je aapünüsü nümüün
chi naajuchikai wane chajaruuta
miyo'ushaata ma'i. E'itaanüshi nia
süpüla nütke'erüünjatüün wayuu yaa
mmalu'u je süpüla su'uniraainjatüün
saa'in wane'ewai sükuu.

⁵ Naakatawalaja'a joo wane
shipekiakat chi Anneetchonkai.
Taapakalaka joo nünüüki wane'eya
chi pienchishii kato'uchiikana:
“Jalaichi”, müshi nia. Eweeta müshia

joo wane ama'aya, mütsiia ma'i. Je najapulu'u chi naajuchikai, eesü wane pesa. ⁶Je pasanainjee nanain na pienchishii kato'uchiikana, taapüin wane pütchi müsü aka saa'in sünüiki wayuu süna'in maa: "Süka aliitpain jamü sainküin mma, eisalajüneesü tü seitakat je tü wiinokat. Kojutüitpa ma'i tü eküütakat süpüshua. Maa aka tü wanekat poote trigo, ketta'alaasü sümaa ni'yataainjut wane wayuu süpüla wane ka'i", malu'utsü tü pütchikat.

⁷Naakatawalaja'a joo wane shipekiakat chi Anneetchonkai. Taapakalaka joo nünüiki wane'eya chi pienchishii kato'uchiikana: "Jalaichi", müshi nia. ⁸Eweeta müshia joo wane ama'aya, atsaana. Otta nünülia chi naajuchikai, "Ouktaa". Otta tü kanüliakat "Hades", tü süpüleekat tü ouktüsükalüürua, oushikaasü nüchiiruajee. E'itaanüshii naya süpüla no'una'alirüinjatüin saa'in wayuu watta saalin, tü shiatapünaakat tü shiatapünaakat wayuu eekat saa'u mmakat. Eejeerü wayuu eekai su'utünüin aa'in sütüma wayuu, eejeerü eekai ouktüin sütüma ayuulii, je eejeerü eekai su'utünüin aa'in sütüma wasashi.

⁹Naakatawalaja'a joo wane shipekiakat chi Anneetchonkai, te'arakalaka naa'in wane wayuuirua joyotüin yaa sü'ütupa'a tü a'ajülee sulu'ujeepü'ukat tü a'waajüleekat Maleiwa. Naya na o'utinnakana aa'in paala saaliijee nanoujain nünüiki Maleiwa je saaliijee naküjain sümüin wayuu süna'in niain Jesús Nasenyotsein. ¹⁰Emetetsü ma'i joolu'u nanüiki süna'in namüin:

"Maleiwakalee, pia Pülashika ma'i. Kasataalejese kasalajanain pütüma maalü saainjala tü o'utakat waa'in, süpüla pasalaainjanain waya pütüma, süka piain maainjalain je süka piain aküjüin waneepia tü shiimüinkat", namakalaka nümüin. ¹¹Nüsouktakalaka joo chi Maleiwakai namüin: "Anakaja müleka ja'atapüle ne'e paala motso'o. Nnojolyülia kettaain tü ka'i pasalaainjatkat o'u jia tatüma. Ta'atapüin no'utinnüin aa'in na wane juwalayuukana a'yanaajiraashiikana wanaa jümaa. Je keraapa süna'in jerainjanain naya, pasalaajeena jia tatüma wanaa namaa", müshi chi Maleiwakai namüin süna'in naapale'einya namüin wane'ewai naku wane nashe'in, kasuujasü ma'i.

¹²Naakatawalaja'a joo wane shipekiakat chi Anneetchonkai. Eirakaashi joo taya nümüin. Akutkujaayaa müsü tü mmakat. Otta chi ka'ikai, epiyuushijaashi sümaa kojain ma'i tü piyuushikat. Otta chi kashikai, eishojooshi maa aka saa'in wane isha.

¹³Otta müstüya tü jolotsükalüürua, ojunuujasü chajee iipünaajee yaa mmalu'ümüin, maa aka saa'in süchon wunu'u eekai sututuün sütüma wawai ja'itasü nnojolüin jewain. ¹⁴Je tü siruma wüitakat, awatuusü maa aka saa'in wane karaloukta. Je tü uuchikalüürua süpüshua, ojunnajasü. Oo'ulaka tü mmakalüürua pasanainkat süna'in palaa, emerojoosü shiinalu'ümüin.

¹⁵Otta tü wayuukolüürua süpüshua, anujulaasü shia saa'upünaa tü uuchikat, sulu'upünaa tü ipakalüürua. Anujulaashii na sülaülashiikana mma, na laülaayuushiikana,

na sülaülakana surulaat, na washinnuukana, na yalayatshiikana, je napüşhua na achepchieekana oo'ulaka na laülaayuukana namüüwa. ¹⁶Na'waatakalaka sümüin tü uuchikalüürua je sümüin tü ipakalüürua sünain namüin: “Kasataalejese jujunnajaain waa'u süpüla junujülüin waya suulia we'nnajünüin nütüma chi joyotakai saa'u tü einaseekat je suulia süsalainjanain waya waainjala nütüma chi Anneetchonkai. ¹⁷Aisha'ajaa, eweetüitpa tü ka'i kasalajanainjatkat o'u wamüin waainjala natüma. ¿Jaraleechi wayuu o'ttaaka süchikijee tüü?” müshii naya.

Aa'inmajünüsü tü nüchepchiakalüürua Maleiwa

7 ¹⁻²Shiasa süchikijee tia, eirakaashi taya yaa mmalu'u. Ee'iyataashii tamüin wane pienchishii aapiee sha'washawalüin süshekeinru'u tü mmakat, wane palaajeeru'u, wane uuchijeeru'u, wane wopujeeru'u, otta wane wüinpejeeru'u. E'itaaushi naya nütüma Maleiwa süpüla najütüinjatüin süchiki pienchisü jouktai süpüla saja'laje'erüinjatüin tü mmakat je tü palaakat je tü wunu'ukolüürua. Akatsa nnojoliyülüin najütüin achiki tü jouktaikat. Te'rakalaka joolu'u wane aapieeka'iya isee wüinpejeekat. Najapulu'usü wane e'inaajia nejeetse chi Maleiwakai matüjainkai ouktaa. Nuwoorulaakalaka joo chi aapieekai namüin na pienchishiikana aapiee, sünain nümüin namüin: ³“Jiyatta paala, nnojo jüjütüin paala tü pienchisükat jouktai aja'laje'erüinjatkat tü mmakat je

tü palaakat je tü wunu'ukolüürua wane'ere'eya jüjütüin shia shi'itaanapa watüma nejeetse chi Wamaleiwasekai ne'ipo'unain na nüchepchiakana”, nümakalaka namüin.

⁴Süküjünakalaka tamüin süchiki sünain shi'itaanüitpain nejeetse chi Maleiwakai shi'ipo'unain 144.000 wayuu sa'akajee süpüşhua tü polookat piammüin e'irukuu nanainjee na wayuu Israelkana. ⁵Tü wayuu e'itaanakat anain tü nejeetsekat, müsü mayaa:

Na'akajee na ni'irukukana Judá, 12.000.

Na'akajee na ni'irukukana Rubén, 12.000.

Na'akajee na ni'irukukana Gad, 12.000.

⁶Na'akajee na ni'irukukana Aser, 12.000.

Na'akajee na ni'irukukana Neftalí, 12.000.

Na'akajee na ni'irukukana Manasés, 12.000.

⁷Na'akajee na ni'irukukana Simeón, 12.000.

Na'akajee na ni'irukukana Leví, 12.000.

Na'akajee na ni'irukukana Isacar, 12.000.

⁸Na'akajee na ni'irukukana Zabulón, 12.000.

Na'akajee na ni'irukukana José, 12.000.

Je na'akajee na ni'irukukana Benjamín, 12.000.

Watta saalin wayuu sha'washawatsü chaa iipünaa

⁹Shiasa süchikijee tia, eirakaashi taya chaa iipünaa sünain shii'yataain tamüin wane wayuuirua watta ma'i saalii

sha'washawatsü nümülatu'u chi joyotakai saa'u tü einaseekat je nümülatu'u chi Anneetchonkai. Isasü achikii nayaawajünüin süka wainmashaatain ma'i naya. Eesü wayuu sa'akajee shi'irukukat tü wayuukalüirua süpüshua, sainküinjee mmakat süpüshua. Kashe'injashii naya wane'ewai nakua kuluulu kasuujasü ma'i, je kajapulu'ushii naya alanatüna süka talatüin ma'i naya. ¹⁰ A'waatüshii naya emetut ma'i sünain maa:

“Wamaleiwasekalee, piakai joyotakai saa'u tü einaseekat, o'ttaashii waya pütüma je nütüma chi Anneetchonkai”.

¹¹ Otta na aapieekana, sha'washawatshii naya napüshua pasanainsü nachiki tü einaseekat, na laülaayuukana, oo'ulaka na pienchishii kato'uchiikana. A'wachiraashii naya sünain na'waajüin chi Maleiwakai ¹² sünain maa nümüin:

“Wamaleiwasekalee, alana'aleeshija'a ma'i pia sünain anain.

Wa'waajüin pia süka kekiin ma'i pia je süka pülashin ma'i pia. Waapüin pümüin analu'ut saa'u kojutüin pia watüma süpüla ka'ikat süpüshua.

Amén, anashi wa'waajüle pia”.

¹³ Otta wane chi laülaashikai, eirakaashi tamüin sünain nusakirüin taya: “¿Pütüjaa aa'uchii jaraliin na wayuu kasuukana ashe'in, otta jalaje'ewaliin naya?”, nümakalaka tamüin.

¹⁴ Tasouktakalaka nümüin: “Laülaashikalee, nnojoshi tatüjaain aa'u. Pia piakai atüjaaka saa'u”, tamakalaka nümüin.

“Naya na ountakana nalatirüin tü müliaa müle'oshaata antakat sünainmüin wayuu sainküin mma. Kasuusü nashe'in süka ala'ajaaushin naainjala noulia sütüma tü nüshakat chi Anneetchonkai.

¹⁵ Müshijese naya ein waneepia nümaa Maleiwa, chi joyotakai saa'u tü einaseekat.

Je na'yataain nümüin waneepia so'uka'i je sa'wai cha'aya sulu'u tü a'waajüleekat nia.

Je aa'inmajüneena naya waneepia nütüma.

¹⁶ Müiria nnojölüin alin jamü namüin, müiria nnojölüin alin münyaasü namüin.

Je nnojoleena e'rüin müliaa sütüma suturula ka'i je sütüma tuttuishii eekai ein.

¹⁷ Nümüilaleena naya Maleiwa sümaa nüla'ateerüin na'wiira noulia.

Aa'inmajüneena naya nütüma chi Anneetchonkai sha'wataakai sü'ütpa'a tü einaseekat,

maa aka saa'inmajünüin wane anneerü nütüma wane anneetpü'i sümaa nu'unirüin sünainmüin wüin anasü”.

Aakatünüsü tü shipekia saja'ttapshimüinjatkat

8 ¹ Naakatawalaja'a joo chi Anneetchonkai tü shipekia saja'ttapshimüinjatkat. Ko'uko'utsü kasa süpüshua cha'aya iipünaa maa aka shiatapünaa oora.

² Te'ralakala na akaratshishiikana aapiee sha'washawatkana waneepia nümülatu'u chi Maleiwakai sünain

saapünüin wane konneeta namüin wane'ewai nakua.

³Otta wane aapieeka'iya, antüshi süinainmüin tü a'ajülee sümülatu'ukat tü einaseekat sümaa sha'watüin nia sü'ütpa'a. Otta najapulu'u wane iita oorole'eya kalu'usuü wainma wunu'u jemeta ejuut aapünakat nümüin süpüla sa'ajününjatüin saa'u tü a'ajüleekat. Je tü sümüsainkat, shiyaawase naashajaala na anoujashiikana nümaa Maleiwa. ⁴Shiasa nijitapa tü wunu'ukot saa'u tü a'ajüleekat, akalitsü tü sümüsainkat iipünaamüin nünainmüin chi Maleiwakai süpüla sotüinjatüin naa'in tü nachuntapü'ukat na anoujashiikana. ⁵Shiasa mapa, najapatakalaka chi aapieekai tü shimechakat siki süka tü iitakat süinain nü'itüin mmakat süka. Sümachetaakalaka shiyaa juya sümaa sütüttaain. Akutkujaa müsia tü mmakat.

A'yalajinnüsü wane konneetairua

⁶Je na akaratshishiikana aapiee aapünakana amüin paala konneeta wane'ewai nakua, yapakalaka naya süpüla na'yalajirüin tü konneetakalüirua.

⁷Chi palajachikai aapiee, ni'yalajirüin tü konneeta najapulu'usükat. A'ita müsia tü juyakat süinain kayeeloin saa'u tü mmakat sümaale'eya siki oo'ulaka isha. Ajütünüsü shia mmalu'umüin nütüma chi aapieekai. Joto müsia kasa süpüshua sütüma tü sikikat süinain süsa'wajüin süse'eru'uweematapünaain tü mmakat. Je chaa eere jotüin tü mmakat, aja'lajaasü tü wunu'ukolüirua oo'ulaka tü

alamakalüirua süpüshua ja'itasü eekai wütüin.

⁸Je ni'yalajitpa joo wane aapieekai tü konneeta najapulu'usükat, sujütünakalaka wane müsü aka saa'in uuchi miyo'u ma'i sümaa jotüin shirokümüin tü palaakat. Ishalaa sümakalaka süse'eru'uweematapünaain tü palaakat sütüma. ⁹Je chaa eere ishain tü palaakat, ouktüsü tü she'ekalüirua sütüma. Je ojuichijaasü tü anuakalüirua sütüma.

¹⁰⁻¹¹Je ni'yalajitpa joo wane aapieekai tü konneeta najapulu'usükat, ojutuu müsia wane jolotsü miyo'u ma'i chajee iipünaajee süinain chuwatüin ma'i shia. Ojutuusü saa'u süse'eru'uweematapünaain tü süchikalüirua otta tü su'wüirakalüirua wüin. Ouktüsü wayuu wainma süsapa tü wüinkat süka süma'amaaitpain tü jolotsükot. Je sünülia tü jolotsükot, "Ouktasiro'ut".

¹²Je ni'yalajitpa joo wane aapieekai tü konneeta najapulu'usükat, nikuukalaka chi ka'ikai, chi kashikai, otta tü jolotsükalüirua süse'eru'uweematapünaa. Piyuushikalaka ma'i watta'ajee maalü süinainmüin kale'oweematüin ka'ikai. Je sa'wai, piyuushikalaka ma'i süse'eru'ujee aikat süinainmüinree eeiwa'aya aikat.

¹³Wanaa sümaa teirakaain namüin na aapieekana, taapakalaka nünüiki wane warulapai chashi waawatüin iipünaa sirumatu'upünaa. Müshi emetut: "Aisha'ajaa, mülialeweetkalaja'a ma'i saa'in tü wayuu manoujainsat yaakat saa'u tü mmakat shi'yalajapeena tü

apünüinsü konneeta isayütkaalia, tü a'yalajeetkat joolu'u", müshi.

9 ¹Je ni'yalajitpa joo wane aapieekai tü konneeta najapulu'usükat, te'rakalaka wane aapiee müshi aka saa'in jolotsü eekai sujuttuuin iipünaajee. Aapünüsü nümüin nütüma Maleiwa shiyaawein shirouse tü Ishi miyo'ukat ma'i.

²Shiasa naakatapa shirouse tü Ishikat, ojuittüsü wane sümüsain miyo'u ma'i maa aka sümüsain siki. Je süka kojain ma'i tü sümüsain ojuittakat sulu'ujee tü Ishikat, epiyuushijaasü chaa iipünaa sütüma je oukuushi chi ka'ikai sütüma.

³Je sa'akajee tü sümüsainkat, shiweetakalaka wane yolujaairua kaashapayaasü saa'umüin tü mmakat. Jashichisü shia atümaa maa aka saa'in je'yulu. ⁴Achiaanüsü tü kaashapakalüirua suulia sheewainjüin tü alamakalüirua je tü a'ttieekalüirua je tü wunu'ukalüirua eekat saa'u mmakat. Nayainjana sheewainka na wayuu nnojoliikana e'itaana anain nejeetse chi Maleiwakai ne'ipo'unain. ⁵Nnojotsü e'itaashin süpüla su'una'alajatüin naa'in na wayukana, süpülatü müliainjanain sütüma so'u ja'rai kashi. Sü'lana'alüinjana naya maa aka sü'lenio'u je'yulu. ⁶Je tia wayuukolüirua so'u tü ja'raikat kashi, kee'ireesü ma'i naa'in oukteen naya. Nnojoshii ouktüin, süka maapujuin tü ouktaakat namüin nütüma Maleiwa.

⁷Je sukuaippa tü kaashapakalüirua, müsü aka saa'in sukuaippa ama eekai yapain süpüla atkaayaa. Sünain nekii, eesü wane kasa müsü aka saa'in kotse oorole'eya shia. Je no'upünaa, müsü aka saa'in su'upünaa wayuu. ⁸Je tü

na'walakat, müsü aka saa'in su'wala jieyuu. Je tü naikat, müsü aka saa'in sai kannajapüt. ⁹Je naa'into'upünaa, eesü wane müsü aka saa'in kachueera naa'into'upünaakat wane surulaat. Je shijijana tü natünakat, müsü aka saa'in suu'uiipsana'ira wainma ama eekai sajaralajüin ayat atkaaya. ¹⁰Tü kaashapakalüirua, kasisü, müsü saa'in süsi je'yulu, süpüla müliainjatüin saa'in tü wayuukolüirua sütüma so'u tü ja'raikat kashi. ¹¹Je chi aluwataakai naya, nia chi aapiee laülaashikai saa'u tü Ishikat. Je nünülia süka pütchi hebreo, Abadón, oo'ulaka süka pütchi griego, Apolión. (Je tü pütchikat, "O'unaiakai wayuwa'in" malu'ut.)

¹²Keraaitpa joolu'u tü palajtkat müliaa ajütünakat sünainmüin tü wayuukolüirua nütüma Maleiwa. Otta isayülia piamasü soo'omüin.

¹³Je ni'yalajitpa joo wane aapieekai tü konneeta najapulu'usükat, taapüin wane pütchi müsü aka saa'in sünüiki wayuu yaa sü'latira tü makat aka su'uwa paa'a sünainkat tü a'ajülee oorokot sütoutajee nümülatu'ukat chi Maleiwakai. ¹⁴Müsü nümüin chi aapiee a'yalajitkai tü konneetakat: "Anakaja müleka püsiwatüle napü na pienchishii aapiee kapükana atümaa chaa sotpa'a tü süchi miyo'usükat kanüliakat Eufrates", müsü nümüin. ¹⁵Süsiwatünakalaka napü na pienchishiikana aapiee süpüla no'utirüinjatüin saa'in maa aka süse'eru'uweematapünaain wayuu eekat saa'u mmakat. Ekeraajuushitüjüli'iya naya süpüla tia. E'itaashitüjülia tü juyakat, kashikat, je tü ka'ikat naa'inrajatkat o'u.

¹⁶Wattashaata ma'i saalii surulaat amaajut ajütünakat joolu'u natüma

na aapieekana süpüla no'utüünjatüün saa'in tü wayuukolüürua. Aküjünüsü tamüün sünnain jerain naya, eetaashijja'a maa aka “doscientos millones”.

¹⁷Na surulaat amaajunakana te'arakana aa'in, eesü kachueera naa'into'upünaa, eesü eekai ishoin maa aka suwarala siki, je eesü eekai wüütüün, je eesü eekai maloukatüün maa aka saa'in so'u “azufre”. Je shikii tü ne'ejenakalüürua, müsü aka saa'in shikii kannajapüt. Ojuittüsü siki saanükülü'ujee sümaa sümüsain oo'ulaka “azufre”. ¹⁸Ouktüsü süse'eru'uweematapünaain wayuu eekat yaa saa'u mmakat sütüma tü ojuittakat saanükülü'ujee. Tü o'utakat saa'in tü wayuukolüürua, shia tü sikikat, je tü sümüsainkat, je tü “azufrekat”. ¹⁹Je süsi, müsü aka saa'in wüi. Kekiisü süpüla süchotüün tü wayuukolüürua. Pülasü ma'i tü amakalüürua süpüla o'utaa saa'in wayuu süka saanükü je süka süsi.

²⁰Otta na wayuu ayatakana katüün o'u süchikijee tüü, mayaasüje ne'rüün tü kasa mojusü alatakat, nnojoliishii naya oo'ulaain suulia akumajaa tü namaleiwaseyaasükalüürua. Ayatshi'iyaa naya sünnain a'waajaa tü yolujaakalüürua. Ayatshi'iyaa naya sünnain a'waajaa tü namaleiwaseyaakat akumajuushikat süka ooro, süka pülaata, süka kachueera paira, süka ipa, je süka wunu'u. Na'waajüün shia ja'itairü me'rüün kasa, ja'itairü maapüün pütchi, je ja'itairü makutulaaain.

²¹Je ayatshi'iyaa naya sünnain o'utaa wayuwa'in, sünnain ee'irajiraa ouutsü, sünnain a'luwajirawaa akuaippaa sümaa wayuu jierü otta wane jierü nümaa wane toolo, je sünnain o'uwajaa sükorolo wayuu.

Chi aapiee kajapulu'ukai wane karaloukta jo'uuchon

10 ¹Te'rakalaka wane aapieeka'iyaa pülashi ma'i sünnain nüshakatüün iipünaajee eejee Maleiwa. Je nüshe'in, müsü aka saa'in wane siruma. Eesü wane kaspolüün iipünaa sünnain nikii. Otta nu'upünaa, müsü aka naa'in chi ka'ikai. Otta nüsa'a, müsü aka saa'in süsa'a wane miichii eekai miyo'uin. Chuwatsü ma'i.

²Eesü wane karaloukta jo'uuchon najapulu'u awastuushisü. Je tü nüsa'a nikialu'ujeeekat, ni'itaaain saa'u tü palaakat, je tü nüsa'a nipe'eru'ujeeekat, ni'itaaain saa'u mmakat. ³Owoorulaashi nia emetut maa aka saa'in sulonüün wane kannajapüt. Je nuwoorulaapa, atüttaasü wane sütürüla juya akaratshitua. ⁴Je taapapa tü sütürülakat juya, anaataashi taya süpüla tashajüünjatüün tü sümakat tü sütürülakat juya. Je wanaa ma'i sümaa tia, taapakalaka wane pütchi chajee iipünaajee sünnain maa tamüün: “Nnojo püshajüün tü aküjünüitpakat pümüün sütüma tü sütürülakat juya. Punujulaja süchiki”, müsü.

⁵Otta chi aapiee te'rakai sünnain sha'watüün saa'u tü palaakat je saa'u tü mmakat, niyaleralakaka tü nütüna nikiakat chaa iipünaamüün sünnain maa: ⁶“Tamüshii paala jia: Alü'ütsü joolu'u süpüla shikeraajüünjatüün nütüma Maleiwa tü naa'inrünnajüttüjütkaalia paala. Tamüsü tüü jümüün nu'upala Maleiwa chi matüjüünkai ouktaa, chi kakumalakai kasakat süpüshua'aya chakat iipünaa, yaakat mmolu'u, je tü eekat shiroku palaakat. ⁷So'u tü ka'i ni'yalajireetkat

o'u konneeta chi waneeshia aapiee isayüika'iya, nikeraajeerü chi Maleiwakai süpüshuale'eya tü kasa naa'inreetüjütkaalia, maa aka nüküjüin paala namüin na nünüikimaajanakana, tü nnojotkat ayaawatünüin aa'u sütüma wayuu", nümakalaka chi aapieekai.

⁸Taapakalaka joo tü pütchikat süchikua chajee iipünaajee, tü taapakat paala, sünnain maa tamüin: "Pu'una nünainmüin chi aapieekai sha'watakai saa'u tü palaakat je tü mmakat, süpüla paapaainjatüin tü karaloukta jutatakak najapulu'u", müsü tamüin.

⁹To'unakalaka nünainmüin chi aapieekai sünnain tachuntüin nümüin tü karaloukta jo'uuchonkot. Otta chi aapieekai, nümakalaka te'ipajee: "Na, paapaapa, pikapan. Meerü aka saa'in mapa shia pikaaiwa'aya süka püsiain shia. Je pimiralapa shia, ishiraa meerü püle'eru'ümüin", nümakalaka tamüin. ¹⁰Taapaakalaka tü karaloukta jo'uuchonkot najapulu'ujee chi aapieekai sünnain teküin shia. Püsiastü ma'i shia tekaaiwa'aya, maa aka saa'in mapa. Otta temiralapa shia, ishiraa müsü shia tale'eru'ümüin. ¹¹Nümakalaka chi aapieekai tamüin: "Anakaja püküjale püchikua süchiki tü naa'inrüinjateetkat chi Maleiwakai naka na wayuu aluwataanakana natüma napüshua na sülaülashiikana mma sa'akajee e'irukuukat süpüshua sainküinjee mmakat süpüshua", nümakalaka tamüin.

**Na piamashii nünüikimaajanakana
Maleiwa**

11 ¹Saapünakalaka tamüin wane koushat emirijia. Je chi Maleiwakai, nümakalaka tamüin:

"Pu'una chamüin Jerusalénmüin sünnainmüin tü a'waajüleekat taya, pimiriijaiwa tü a'waajüleekat oo'ulaka tü a'ajüleekat. Je piyaawaja na wayuu chakana a'waajüin taya.

²Otta tü süpaatiasekat, nnojoleerü shia pimiriijain, süka saapünüin paala namüin na gentilekana, na anteenakana so'uweena wane ka'i süpüla napümüin saa'in tü wayuu sulu'ukat tü pueulokat so'u apünüin juya shiatapünaa, tü 1.260 ka'i.

³Tajüiteena piamashii tanüikimaajana süpüla o'unaa sa'akamüin wayuu süpüla naküjainjatüin tanüiki sümüin su'unnaa tü 1.260 ka'i. Ka'lesü ma'i nash'ein na'atüinjatkat saa'u mojuin ma'i naa'in sütüma tü kasa taa'inrüinjatkat sümüin tü wayuukolüirua", nümakalaka chi Maleiwakai tamüin.

⁴Na piamashiikana nünüikimaajana, naya kayaawaseka tü piamasükat wunu'u "olivo" münakat oo'ulaka tü piamasükat rampara sulu'upü'ütakat tü a'waajüleekat Maleiwa Aluwataakai saa'u wayuu süpüshua. ⁵Je tü wayuu eekai su'uteein naa'in na nünüikimaajanakana, aja'tteerü natüma süka siki ojuittakat naanükülü'ujee. Meerü nütüma Maleiwa süpüshua eekai su'uteein naa'in. ⁶Je e'itaanüshii naya nütüma Maleiwa süpüla nata'ülüinjatüin tü juyakat suulia sü'itüin süma'inru'u naküjüin nünüiki. Je e'itaanüshii naya nütüma süpüla na'wanajainjatüin tü süchikalüirua sünnain ishain je süpüla najütüinjatüin ayuulii je müliaa sünnainmüin wayuu sainküin mmakat eepünaakai jeratuain nachekakat.

⁷Shiasa süchikijee kettaain naküjain nünüiki Maleiwa,

eweeteechi chi wanülüüi
 sulu'ujeejachikai tü Ishikat.
 Amutteechi naa'u na piamashiikana
 sünnain ouktaleeinya naya
 nütüma, süka katsüin ma'i nia
 noulia. ⁸Süchikijee tia, napüteena
 naya palastüin yaa pülaasüpa'a
 sulu'u tü pueulo müle'osükat, tü
 akachennakat alu'u paala chi
 Nasenyotsekai sünnain wane
 wunu'u süpüla ouktaa. Na wayuu
 yaakana sulu'u, müshii aka saa'in
 tü wayuukolüürua paala sümaiwa
 chajatkalüürua sulu'u tü pueulokat
 Sodoma oo'ulaka sulu'u tü mmakat
 Egipto sünnain e'rülüin wayümüin
 naya namüin na nüpüshikana
 Maleiwa. ⁹Je so'u apünüin ka'i
 shiatapünaamüin, ayateena naya
 palastüin. Shi'rajaweena wayuu
 sa'akajeejatü tü e'irukuukat
 süpüshua sulu'ujee mmakat
 süpüshua. A'alijinneena naya suulia
 ojoitünaa. ¹⁰Je tü wayuukolüürua
 sainküin mmakat süpüshua,
 emi'ijaajeerü sümaa süsülajiraain
 kasa anasü süka ouktüinapain na
 piamashii nüniükimaajanakana
 Maleiwa müliapü'ükana atüma
 wayuu sainküin mmakat süpüshua.
¹¹Shiasa süchikijee tü apünüinkat
 ka'i shiatapünaamüin, oso'iraasü
 naa'in na piamashiikana nütüma
 chi Maleiwakai. Mmotkalaka
 ma'i tü wayuukolüürua shi'rapa
 na ouktüshiikana paala sünnain
 sha'washawalüin yaa pasanain
 nanain. ¹²Je na piamashii
 nüniükimaajanakana Maleiwa,
 naapakalaka joo wane pütchi chajee
 iipünaajee sünnain emetuluin ma'i
 shia sünnain maa namüin: "Jalaina
 yaa iipünaamüin", sümakalaka
 namüin. Je wanaa sümaa
 erakaashiin na na'ünüükana

namüin, ayaleraashii naya
 iipünaamüin no'upala sa'aka wane
 siruma.

¹³Akutkujaa müsia joo tü mmakat
 sümaa sujuttüin miichi wainma
 mmolu'ümüin sütüma, waneesüwai
 sünnainjee poloosü miichi sulu'u tü
 pueulokat. Ouktüsü wayuu wainma
 sütüma, maa aka 7.000. Je na
 wayuu apütaakana sünnain katüin
 no'u, eimolojooshii naya sütüma tü
 ne'rakat je nee'iyatakalaka nujut chi
 Maleiwakai chakai iipünaa.

¹⁴Keraaitpa joolu'u tü chiiruajatkat
 müliaa ajütünakat sünnainmüin tü
 wayuukolüürua nütüma Maleiwa.
 Otta alü'ütsü waneesia soo'omüinya.

**A'yalajinnüsü joo tü konneeta
 saja'ttapshimüinjatkat**

¹⁵Je ni'yalajitpa joo wane
 aapieekai tü konneeta
 najapulu'usükat, eweetüsü süniüiki
 wane aapieerua chajee iipünaajee
 eejee chi Maleiwakai sünnain
 emetuluin ma'i nanüiki sünnain maa:

"Naapaain joolu'u chi Maleiwakai
 nümaa chi Cristo
 Nüneekajalakai
 tü aluwatawaakat saa'u wayuu
 süpüshua.

Aluwataajeechi joolu'u chi
 Maleiwakai waneepia
 süpüla ka'ikat süpüshua".

¹⁶Je na piamakana shikii pienchimüin
 laülaayuu, na joyojoyotkana
 nümlatu'u chi Maleiwakai,
 ashakatüshii naya saa'ujee tü
 neinasekat süpüla na'wachiraainjanain
 sünnain na'wajüin chi Maleiwakai.

¹⁷Müshii naya nüümüin:

"Maleiwakalee, Aluwataakai
 Pülashikai ma'i,
 shiimüin sünnain ein pia
 maa'ulu yaa,

sünain eetüjülin pia sümaiwa,
je sünain eenjachin pia
waneepia süpüla ka'ikat
süpüshua.

Waapüin pümüin analu'tut,
süka pu'ttüin sünain
aluwatawaa
sümaa pii'iyatüin sümüin
wayuu sünain piain laülaain.

¹⁸ Jashichisü ma'i tü wayuu
manoujainsatkalüirua
sainküin mmakat süpüshua
pümüin.

Otta müsia joolu'u, pii'iyateerü
sümüin wayuu süpüshua
sünain jashichishaatain ma'i
pia saa'u naainjala.

Antüitpa sükalia süpüla
kasalajanainjatüin pütüma
saainjala tü wayuu
ouktüsükalüirua.

Je aja'tteena pütüma na wayuu
o'utapü'ükana saa'in wayuu
sainküin mma.

Je antüitpa sükalia süpüla
puwalaajüinjanain na
anoujashiikana pünain,
na eekai ne'nnaajünüin
sütüma wayuu je eekai
me'nnaajuuin.

Awalaajüneena pütüma
napüshua na eekai
na'yataain pümüin saa'u
kojutüin pünülia,
maa aka na
pünüikimaajanakana
sümaiwa paala".

¹⁹ Otta müsia joolu'u, ojutalaaaitpa
tü a'waajüleekat chi Maleiwakai
chakat iipünaa. Je chaa sulu'u,
ja'yashiitpa tü juraskeerü
sulu'upü'ükat tü a'waajüleekat
Maleiwa yaa mmalu'u.
Sümachetaakalaka shiyaa juya
sümaa sütütaain. Je akutkujaa

müsia tü mmakat. Je a'ita müsia tü
juyakat sünain kayeeloin saa'u tü
mmakat.

Tü jietkat oo'ulaka chi kayuushikai

12 ¹Ee'iyataasü joolu'u
wane jierü chaa iipünaa
sirumatu'u, ponosü ma'i saa'in
wayuu. Je tü süshe'inkat, müsü
aka naa'in chi ka'ikai. Je suupünaa
suu'ui, eeshi chi kashikai. Je
sünain shikii, eesü wane kotse maa
aka nakotse na sülaülakana mma,
kanainsü poloo piammüin jolotsü.
²Ipoonsü shia. A'yalajüsü ma'i shia
sütüma saalin tü jo'uukot süka
yapain süpüla jemeyulaa.

³Ee'iyataasü joolu'u wane kasaya
keemasü ma'i chaa sirumatu'u,
wane kayuushi miyo'ushaata ma'i
sünain ishoin ma'i nüta. Ponotooshi
saa'in wayuu chii'iyaa. Akaratshisü
nikii je poloosü nu'uwa. Je saa'u
tü akaratshisükat nikii, eesü
kotse jo'uuchen. ⁴Nipitakalaka
süse'eru'uweematapünaain tü
jolotsükalüirua chajee iipünaajee
süka nüsi yaa mmalu'ümüin. Otta
yaa mmalu'u, nüsha'walaakalaka
sümülatu'u tü jietkat shii'iree
nikeein chi süchonkai jemeipa.

⁵Jemeyutkalaka joolu'u
tü jietkat nümaa wane jo'uu
toolo. Chi jo'uu anii jemein,
e'itaashitüjü'iyaa paala süpüla
nuluwataainjacheechin saa'u
wayuu sainküin mmakat süpüshua,
sünain me'rujuinjachin amüin
nia. Niweetapa chi süchonkai,
asaajaanüshi nia nütüma
Maleiwa chaa iipünaamüin
süpüla chainjachin nümaa eere
nuluwataain. ⁶Su'luwataakalaka
tü jietkat sulu'ümüin wane mma
maa'inyatuuisü, tü yapatjütükalaa

nütüma Maleiwa süpüla, einjatüle
saa'inmajünüin so'u 1.260 ka'i.

⁷Je eesü wane atkawaa cha'aya
iipünaa eere chi Maleiwakai. Chi
aapiee müle'oshikai kanüliakai
Miguel je na aapiee nümaajanakana
nütüma Maleiwa, atkaashii naya
nümaa chi kayuushikai je sümaa
tü aapiee nümaajatkaliirua.

Otta nayakana, eejiraashii
naya nümaa Miguel. ⁸Otta chi
kayuushikai je na nümaajanakana,
ayamülüushi nütüma Miguel.
Nujutüin naya chajee iipünaajee.

Male'ejünreesalii naya chamüin.

⁹Chi kayuushi miyo'ushaata
ojutünakai nüma'anajee Maleiwa,
nia chi wüi nümaiwajaikai, chi
sülaülakai yolujaa kanüliakai
Satanás, chi e'ike'erakai
wayuu sainküin mmakat
süpüshua. Ojutünüichipa nia yaa
mmalu'umüin namaa na aapiee
nümaajanakana.

¹⁰Taapakalaka wane pütchi chajee
iipünaajee sünnain emetuluin ma'i
shia sünnain maa:

“Ekerajaajerü joolu'u tü
naa'inrüinjatkat chi
Maleiwakai

süpüla nu'tte'erüinjanain na
nüpüshikanairua.

Sütüjaajerü aa'u joolu'u wayuu
süpüshua

sünnain niain pülashin süpüla
aluwatawaa.

Akaajaa Cristo chi

Nüneekajalakai, o'ttüichipa
nia sünnain aluwatawaa.

Süka jamüin, nnojolichipa ein
chi Yolujaakai nümülatu'u
Maleiwa

sünnain eperulajaa waneepia
nachiki na wawalayuukana
so'uka'i je sa'wai.

Ajutünüichipa nütüma

Maleiwa chajee

nüma'anajee.

¹¹Je yaa mmalu'u süma'aya,
akanajuuichipa nia natüma
na wawalayuukana
sükajee tü nüshakat chi
Anneetchonkai amülakat
paala saa'u saainjala wayuu,
je sükajee naküjain nachiki
sünnain no'tte'ennüin
nütüma Cristo.

Nnojoliishii mmolüin seema
o'utünaa aa'in sünnainjee
aküjaa nachiki sünnain
anoujaa nünain.

¹²Je sükajee nujutünüichipain chi
Yolujaakai,
anakaja müleka talatüle
waa'in wapüshua waya
yaakana iipünaa nümaa
Maleiwa.

Otta müshi'iya jia kepiakana
sainküin mmakat
süpüshua'ale,

müle'o ma'i tü müliaa

ji'reetkat,

süka nujutünüichipain chi
Yolujaakai ja'akamüin.

Je jashichishaatashi ma'i nia,
süka nütüjaain saa'u sünnain
sülü'ülüin nükalia süpüla
ata'ünnaa”.

¹³Shiasa ni'rapa chi kayuushikai
sünnain nujutünüin mmalu'umüin,
nülojokalaka süchiirua tü
jietkat jemeyulüitpakat nümaa
chi jo'uukai. ¹⁴Shiasa tü jietkat,
aapünüsü katünaa sümüin, maa
aka saa'in warulapai, süpüla
suwatüinjatüin nüpüleerua chi
kayuushikai sulu'umüin tü mma
maa'inyatuuusikat, tü yapatüjütka
nütüma chi Maleiwakai süpüla,
einjatüle saa'inmajünüin so'u

apünüin juya shiatapünaa. ¹⁵Niasa chi kayuushikai, neetakalaka wane wüin miyo'u ma'i, müsü aka saa'in süchi, süchiirua tü jietkat süpüla süsaapünaainjatüin sümaa. ¹⁶Sükaaliijünakalaka tü jietkat sütüma tü mmakat, sujatalüin saanükü süpüla tü wüin neetakat chi kayuushikai. ¹⁷Jashichishaatakalaka joo chi kayuushikai sümüin tü jietkat. Nu'unakalaka süpüla nütkaainjachin namaa na wane süchooinkana, na oonookana waneepia sümaa tü nuluwataakat anain chi Maleiwakai, na aküjakana nüchiki Jesús sümüin wayuu sünain niain Nasenyotsein.

13 ¹Sha'watüshi chi kayuushikai sotpa'amüin tü palaakat.

Chi wanülüü shirokujeejachikai palaa

Te'rakalaka wane wanülüü sünain nujuittaain shirokujee tü palaakat. Poloosü nu'uwa oo'ulaka akaratshisü nikii. Eesü kotse jo'uuchen sünain wane'ewai sükua tü poloosükat nu'uwa. Je sünain wane'ewai sükua tü akaratshisükat nikii, ashajünüsü wane anüliee airu'ut nümüinjatü Maleiwa. ²Je chi wanülüükai, müshi aka naa'in wane kalaira. Otta tü nuu'uikat, müsü aka saa'in suu'ui jeesü. Otta tü naanükükat, müsü aka saa'in saanükü wane kannajapüt. Pülashi ma'i nia nütüma chi kayuushikai. Je süka laülaain chi kayuushikai saa'u mmakat süpüshua, ni'itaain chi wanülüükai süpüla aluwatawaa wanaa nümaa. ³Je wane tü nikiikat chi wanülüükai, kasipalasü maa aka süsipala shikii wayuu eekai o'utuushin aa'in. Oo'ulaka müsia tü wayuukolüirua sainküin mmakat süpüshua, pontüshi

ma'i saa'in chi wanülüükai süka katüin no'u süchikijee mayalii. Soonookalaka sümaa nünüiki. ⁴Nasapainyo'ukakalaka naya sünain na'waajüin chi kayuushikai süka ni'itaain chi wanülüükai süpüla aluwatawaa. Akaajaa nümüin chi wanülüükai sünain na'waajüin nia sünain maa: "Nnojoshi ein wane makai aka naa'in chi wanülüükai sünain pülashin ma'i. Nnojotsü jaraleerüin ayamülüin nia", namakalaka.

⁵Chi wanülüükai, oo'ulaanüshi nütüma Maleiwa sünain aluwatawaa so'u apünüin juya shiatapünaamüin. Nuu'ulaain sünain mojuin nünüiki nümüin je sünain pülain naa'in nuulia. ⁶Mojukalaka nünüiki nümüin Maleiwa, sümüin tü a'waajüleekat nia, je namüin napüshua na eekana nümaa chaa iipünaa. Airu'utsü ma'i nünüiki nümüin waneepia. ⁷Oo'ulaanüshi nütüma Maleiwa sünain aluwatawaa saa'u e'irukuukat süpüshua sainküin mmakat süpüshua. Otta na nüpüshikana Maleiwa, ayamütshii naya nütüma chi wanülüükai süka nuu'ulaanüin nanain. ⁸A'waajünüshi chi wanülüükai sütüma wainma wayuu sainküin mmakat, tü nnojotkat ashajüntüin anülia sulu'u tü karaloukta kalu'ukot nanülia na wayuu ee'iranajaakana aa'in nütüma chi Anneetchonkai o'utinnaakai aa'in, chi eetüjüika'iya achiki sükumajaiwa'aya tü mmakat sünain ouktajachin.

⁹Tayakai Juan, tamüshii paala jia: Müleka kapürale jaa'in tanüiki, anasü jülüjüle jaa'in pütchikat tüü:

¹⁰Chi eekai e'itaaushin nütüma Maleiwa süpüla püreesaa, püreeseechi.

Chi eekai e'itaashin nütüma
süpüla o'utinnaa aa'in,
o'utüneechi aa'in.

Je sükajee tia, jia anoujashiikana
jüpüshua, anakaja müleka
jüchecherüle jaa'in süna'in anoujaa
su'unnaa tü müliaa ji'rakat.

Chi wanülüü mmaapüjeejachikai

¹¹Te'rakalaka joo wane
wanülü'üya süna'in nujuittaain
shiinalu'ujee tü mmakat. Piamasti
nu'uwa jo'uuchen maa aka
saa'in nu'uwa wane anneetchon.
Otta emetüsü ma'i nünüiki
süna'in nuwoorooloin, maa aka
saa'in nünüiki wane kayuushi.

¹²E'itaanüshi chi wanülüü antüshikai
nütüma chi palajachikai wanülüü
süpüla nükaalinjüinjachin nia
süna'in aluwatawaa. Aluwataanüsü
tü wayuu manoujainsatkalüürua
nütüma chi chiiruajachikai
wanülüü sainküin mmakat süna'in
süsapainyo'ukainjatüin shia sümaa
su'waajüin chi palajachikai wanülüü,
chi katakai o'u süchikijee mayalii.

¹³Naa'inrüin chi chiiruajachikai
wanülüü wainma kasa maa aka
tü nütüjakat apüleerua Maleiwa
nümüüwa, tü ponokat saa'in wayuu,
maa aka nujutüin siki chajee
iipünaajee yaa mmalu'ümüin
su'upala wayuu wainma.

¹⁴Je tü kasa naa'inrakat, naa'inrüin
süpüla kojutüinjachin sütüma wayuu
chi palajachikai wanülüü. Je chi
chiiruajachikai wanülüü, ni'ike'eriün
tü wayuu manoujainsatkalüürua
sainküin mmakat. Nuluwataain
na wayuukana süna'in akumajaa
niyaakua chi palajachikai wanülüü
süpüla kojutüinjachin nia natüma,
chi kasipalakai nikiinain süka wane
chajaruuta. A'waajünüshi nia natüma

na wayuukana süka katiün no'u
süchikijee tü kasipalakat atüma.

¹⁵Chi chiiruajachikai wanülüü,
oo'ulaanüshi nütüma Maleiwa
süna'in naapüinjatüin kataa o'u
sümüin niyaakua chi palajachikai
wanülüü je süpüla saashajaanjatüin.
Otta süpüshua tü wayuukolüürua
eekai nnojolüin su'waajüin tü
ayaakuaakat, o'utinna aa'in nütüma.

¹⁶Aluwataanüsü tü wayuukolüürua
süpüshuale'eya nütüma chi
chiiruajachikai wanülüü süpüla
shi'itaanajatüin wane jeerü süna'in
tü najapü nekiakat je ne'ipo'unain
shiale. E'itaanajatü tü jeetkat
süna'in wayuu süpüshua, süna'in
wayuu eekai kojutüin, süna'in eekai
mojutüin, süna'in eekai washinnuün,
süna'in eekai müliain, süna'in wayuu
eekai achepchieein, je süna'in wayuu
eekai laülaain sümüüwa. ¹⁷Je chi
eekai nnojolüin ni'itaanüin anain tü
jeetkat, nnojoleerü taashin nüpüla
oikkaa je ayalajaa wane kasa. Je
tü jeerü e'itaanakat süna'in tü
wayuukolüürua, shia nünülia chi
palajachikai wanülüü oo'ulaka wane
“número” shiyaawase.

¹⁸Tamüshii paala jia: Tü
nejeetsekat chi palajachikai wanülüü,
666. Kasataalejese kekiin jia süpüla
jiyaawatüinjatüin saa'u kasain
kayaawasein tü nünúmerosekat.
Shiyaawasesa'a shia nünülia wane
wayuu.

Chi Anneetchonkai je na wayuu taashishiikana

suulia naainjala

14 ¹Eirakaataalasti joo
taa'in iipünaümüin.
Te'rataalalakalaka joo chi
Anneetchonkai sha'watüin cha'aya

saa'u tü wutai kanüliakat Sion sümaa wayuu watta saalii, maa aka 144.000 wayuu. Naya na ashajünakana e'ipo'unain nünülia chi Anneetchonkai je nünülia chi Nüshikai. ²Taapakalaka joo wane ee'irajaa chajee iipünaajee müsü aka saa'in su'lotüin süchi eekai müle'oin, müsü aka saa'in sütürüla juya eekai emetuluin, müsü aka saa'in shi'ira wane "arpairua" atalejuushi. ³Je tü wattakat saalii wayuu, asha'walaashii naya nümülatu'u chi joyotüshikai saa'u tü einaseekat, je namülatu'u na pienchishii kato'uchiikana, je namülatu'u na piamakana shikii pienchimüin laülaayuu. Nee'irajüin wane jayeechi jeket. Naya namüüwa atüjaka ee'irajaa tü jayechikat süka nayain taashiinapain nütüma Maleiwa suulia naainjala sa'akajee wayuukot süpüshua. ⁴Naya na nnojoliikana yarüttüin aa'in sütüma ama'üjawaa sümaa jieyuu. Wulesü naa'in, süka ichein naya waneepia nünain chi Anneetchonkai soo'opünaa tü alatakat namüin. Je saa'u taashiinapain naya nütüma Maleiwa sa'akajee wayuu, kee'ireesü naa'in süpüshua tü nüchekakat napüleerua je tü nüchekakat chi Anneetchonkai napüleerua. ⁵Matüjüinsalii aküjaa alawaa, lotüsü nakuaippa nu'upala Maleiwa.

Tü naküjakat wane aapiee apünüinshii

⁶Te'rakalaka wane aapiee waawatüin iipünaa sirumatu'upünaa. E'itaaushi nia süpüla aküjaa sümüin wayuu nünüiki chi Maleiwakai, tü pütchi shiimüinkat süpüla ka'ikat süpüshua. Nüküjainjatü shia sümüin e'irukuukat süpüshua sainküin mmakat süpüshua. ⁷Nümakalaka

sünain emetuluin ma'i nünüiki: "Anakaja kojutule jütüma chi Maleiwakai sümaa ju'waajüin nia, süka sülü'tülüin nükalia sünain süsalainjatüin saainjala wayuu nütüma. Anakaja müleka jüsapainyo'ukale jia nümülatu'u sünain jii'iyatüin nümüin nujut, süka niain kakumalain kasakat süpüshua cha'aya iipünaa, je süka niain kakumalain tü mmakat je tü palaakat oo'ulaka tü su'wüirakalüirua wüin", müsü nünüiki chi aapieekai.

⁸Ee'iyataataalashi joolu'u wane aapieeka'iya sünain maa: "Ajuttamaateerü joolu'u tü pueulo kanüliakat Babilonia, kojutpü'ukat sütüma wayuu. Na kepiakana cha'aya, kaainjaralii napüshua. Nayouktüin chi Maleiwakai süpüla o'unaa süchiirua tü maleiwayaasükat natüma. Je naainjirapü'üin kasa mojusü tü wayuukolüirua sainküin mmakat süpüshua süka tü maleiwayaasükat", nümakalaka.

⁹Ee'iyataataalashi joo wane aapieeka'iya. Emetutsü ma'i nünüiki sünain maa: "Chi wayuu eekai nüsapainyo'ukain sümaa nu'waajüin chi palajachikai wanülüü, chi kasipalakai nikiinain, oo'ulaka nu'waajüin tü niyaakuakat sümaa kanain tü nejeetsekat ni'ipo'unain oo'ulaka najapünain shiale, ¹⁰süsaleechi nia nütüma Maleiwa. Jashicheechi ma'i chi Maleiwakai namüin na wayuu aa'inrakana tia. Müliashaateena naya nütüma. Ojutüneena naya nütüma Maleiwa so'umüin tü siki ka'akakat 'azufre'. Mülieena ma'i naya sütüma tü sikikat no'upala na aapiee eekana nümaa Maleiwa je nu'upala chi

Anneetchonkai. ¹¹E'reena naya müliiaa waneepia so'uka'i je sa'wai. Müiria moyokojoin tü siki müliakat attüma naya", nümakalaka chi aapieekai.

¹²Tamüshii paala jia anoujashiikana, jia oonookana waneepia sümaa tü nuluwataakat anain Maleiwa, jia ichekana nünain Jesús: Anakaja müleka jüchearchüle jaa'in sünaain anoujaa. Jiyaawata saa'u sünaain süsaleenain maali nütüma Maleiwa naainjala na kaainjaraliikana.

¹³Taapakalaka joolu'u wane pütchi chajee iipünaajee sünaain maa tamüin: "Püshaja tüü: No'ujee ka'ikai chii, anata'aleeshija'a ma'i chi wayuu ouktakai sünaain anoujaa nünain chi Senyotkai", müsü tamüin.

Otta nünüiki chi Naa'inkai Maleiwa: "Shiimain ma'i tia. Eemeraajeena naya suulia tü müliaakat. Je nnojoleerü motüin taa'in tü kasa anasü naa'inrapü'ükat kataiwa'aya no'u", müshi.

Süsalasü wayuu saainjala nütüma Maleiwa

¹⁴Eirakaataasü joo taa'in iipünaamüin. Te'ratalakalaka wane siruma kasuusü je wane wayuu joyotüin saa'u. Eesü wane kotse oorole'eya sünaain nikii oo'ulaka wane rüi najapulu'u, o'yonoojia pünajüt, kasasü ma'i.

¹⁵Nujuittaakalaka wane aapiee sulu'ujee tü a'waajüleekat Maleiwa. Nu'waatalakalaka nümüin chi joyotüshikai saa'u tü sirumakat sünaain maa nümüin: "Anakaja pu'unüle joolu'u sünaain pajapulu'uin tü rüikat, süpüla pükotchajüinjatüin tü wayuukolüirua, maa aka sükotchajünüin tü pünajütkat.

Süka jamüin, keraaitpa sükalia süpüla okotchajünaa sainküinjee mmakat süpüshua", nümakalaka chi aapieekai nümüin. ¹⁶Je chi joyotüshikai saa'u tü sirumakat, o'yonoojoo müshia nia sümaa nükotchajüin shia sainküinjee mmakat.

¹⁷Nujuittaakalaka joo wane aapieeka'iyaa sulu'ujee tü a'waajüleekat. Kajapulu'utaashia chii'iyaa rüi o'yonoojia pünajüt, kasasü ma'i. ¹⁸Otta wane aapieeka'iyaa, chi aa'inmajüikai siki saa'ukat tü a'ajülee sulu'ukat tü a'waajüleekat, nujuittaakalaka sü'ütta'ajee tü a'ajüleekat. Nümakalaka sünaain emetuluin nünüiki nümüin chi aapiee kajapulu'ukai tü rüikat: "Paapaa pümata tü pürülia kasakat ma'i. Pu'una pükotchajaiwa tü wayuukolüirua, maa aka sütpajünüin uuwa, süka jamüin, keraaitpain sükalia süpüla okotchajünaa sainküinjee mmakat süpüshua", nümakalaka nümüin. ¹⁹⁻²⁰Nükotchaja nümüisia chi aapieekai tü manoujainsatkalüirua sainküinjee mmakat. Nu'utüin saa'in anouipa'amüin suulia tü pueulokat. Amülakalaka tü nashakat na wayuukana, na wayuu süsalashiikana naainjala nütüma Maleiwa. Palantüsü süpa'apünaa tü mmakat maa aka saa'in süchi. Süsa'watüin maa aka 300 "kilómetro". Otta süka'lein saa'u mmakat, shi'iyeeinsepünaasü wane ama.

Yapashii akaratshishii aapiee süpüla ajüttaa nü'ürüla Maleiwa saa'u wayuu

15 ¹Ee'iyataasü joolu'u wane kasa chaa iipünaa sirumatu'u, ponüsü ma'i saa'in wayuu. Akaratshishii aapieerua

yapashii süpüla ajütaa akaratshisü müliaa sünainmüin wayuu. Je süjütünapeena süpüshua, keraajeerü tü naa'inrüinjatkat chi Maleiwakai sümüin tü wayuukolüürua süsala saainjala. ²Te'rakalaka joo wane kasa jamatüin müsü aka saa'in palaa, korottüsü ma'i maa aka saa'in wane rouya. Chuwatüsü ma'i süpa'apünaa müsü aka suwarala siki. Te'rakalaka joo na wayuu eekai nayouktüin a'waajaa chi wanülüü kasipalakai nikiinain, eekai nayouktüin a'waajaa tü niyaakuakat, eekai nayouktüin e'itaanüin anain sünumerose tü nünüliakat süka noonooiin nümaa Jesús. Sha'washawatshii naya sotpa'a tü palaakat sünain kajapulu'uin wane'ewai nakua wane “arpa” naapajala Maleiwa namüin. ³Ee'irajüshii naya wane jayeechi kojutkai atüma chi Anneetchonkai, maa aka saa'in tü jayeechi kojutkat atüma chi Maleiwakai sümaiwa paala nütüma Moisés, chi a'yataapü'ükai nümüin Maleiwa, sünain müin nanüiki:

“Maleiwakalee, pia chi Aluwataakai Pülashikai ma'i, wa'waajüin pia süka alana'aleein ma'i pia sünain anain tü paa'inrakat. Pia Aluwataakai saa'u wayuu sainküin mmakat süpüshua, je lotüsü ma'i pukuaippa sünain paa'inrüin tü anasükat waneepia sümüin wayuu.

⁴Maleiwakalee, kojuteechi pia sütüma wayuu süpüshua je na'waajeechi pia süka waneeshinya piain maainjalain. Shiimüin sünain sünteerüin tü wayuukolüürua pünainmüin

sainküinjee mmakat süpüshua, süpüla nasapainyo'ukain pümülatu'u sünain na'waajüin pia, süka ne'rüin tü kasa lotüsü paa'inrakat”.

⁵Shiasa süchikijee tia, teirakaakalaka chaa iipünaa. Te'rakalaka sulu'upünaa tü a'waajüleekat Maleiwa sünain jutatüin tü paü shiinalu'usükat.

⁶Najuittaakalaka na akaratshishiikana aapiee sulu'ujee tü a'waajüleekat sünain yapain süpüla ajütaa tü akaratshisükalüürua müliaa sünainmüin wayuu. Wulejashaatasü ma'i nashe'in, wane kuluulu kanüliasü “lino” sünain chinatüin shia. Je naluuwainpünaa, eesü wane kuluulu oorole'eya. ⁷Je wane na pienchishii kato'uchiikana, naapakalaka wane iita oorole'eya namüin wane'ewai nakua na akaratshishiikana aapiee. Kalu'usü nü'ürüla chi Maleiwakai matüjainkai ouktaa süliainjatkat wayuu süsala saainjala. ⁸Je tü a'waajüleekat, warattuuisü ma'i süka eein chi Maleiwa Pülashikai ma'i sulu'u. Isasü süchiki shikerolüin wayuu sulu'umüin tü a'waajüleekat wane'ere'eya shikeraajapa tü akaratshisükalüürua müliaa ajütünajatkat sünainmüin wayuu natüma na akaratshishiikana aapiee.

Tü akaratshisükat iita müliaamaajatkat

16 ¹Taapakalaka joo wane pütchi emetutsü ma'i sulu'ujee tü a'waajüleekat chaa iipünaa sünain maa namüin na akaratshishiikana aapiee: “Ju'una jumata ji'yotoiwa saa'u wayuu

süpüshua sainküin mmakat tü müliaa sulu'ukot tü akaratshisükat iita, tü naashichinkat chi Maleiwakai”, sümakalaka.

²Nu'unakalaka chi palajachikai aapiee süna'in ni'yotüin tü sulu'ukat tü iita najapulujutkat saa'u wayuu sainküin mmakat süpüshua. Je na wayuu kanainkana nejeetse chi wanülüükai, na eekai na'waajüin tü niyaakuakat, eweetüsü nanain wane yooi kajükat atüma ma'i nata sümaa alin ma'i namüin.

³O'yototoojo'o joolu'u chi wane aapieeka'iyä tü sulu'ukat tü iita najapulujutkat saa'u tü palaakat. Ishalaa müsia tü palaakat sütüma, müsü aka saa'in nüsha wane müliashii. Ouktakalaka süpüshua tü she'ekat palaa sütüma.

⁴O'yototoojo'o joolu'u chi wane aapieeka'iyä tü sulu'ukat tü iita najapulujutkat saa'u tü süchikalüirua je tü su'wüirakalüirua wüin. Ishalaa müsia tü wüinkat sütüma. ⁵Taapakalaka joo nünüiki chi aapiee aa'inmajüikai tü wüinkat süpüshua süna'in maa:

“Pia Maleiwa Maainjalasaikai.

Eeshi pia maa'ulu yaa,
eetüjü'iyä pia sümaiwa.

Anasü tü paa'inrakat joolu'u
süna'in kasalajanain
naainjala na wayuukana
pütüma namüin.

⁶ Süka jamüin, amülasü nasha
na püpüshikana je na
pünüikimaajanakana
natüma.

Je joolu'u, püsirüinjana naya
isha süka kaainjalainja'a
naya puulia”.

⁷Taapakalaka wane pütchi ni'ipajee chi aapieekai eejee tü a'ajüleekat süna'in maa:

“Maleiwakalee, pia Aluwataakai
Pülashikai ma'i,
shimüin süna'in lotüin ma'i
pukuaiippa joolu'u süna'in
kasalajanain naainjala
na wayuukana namüin
pütüma”.

⁸O'yototoojo'o joolu'u chi wane aapieeka'iyä tü sulu'ukat tü iita najapulujutkat naa'u chi ka'ikai. Koo'omüin müsia naa'ira chi ka'ikai nütüma Maleiwa süpüla jotüinjatüin tü wayuukolüirua sütüma tü nuchuwalakat. ⁹Ishakalaka ma'i nata na wayuukana nütüma chi ka'ikai süka ja'in ma'i. Mojukalaka nanüiki nümüin Maleiwa, süka nüjütüin tü müliaakat nanainmüin. Je nnojoliishii oo'ulaain suulia naainjala süpüla na'waajüin Maleiwa.

¹⁰O'yototoojo'o joolu'u chi wane aapieeka'iyä tü sulu'ukat tü iita najapulujutkat saa'u tü einasee eere nuluwataain chi wanülüükai. Epiyuushijaa müsia eere kepiain na a'waajakana nia. Je koo'omüinsü ma'i namüin na wayuukana müliaa. ¹¹Mojukalaka ma'i nanüiki nümüin chi Maleiwa chakai iipünaa süka müliain ma'i naya saalii tü yooi nanainkat, otta nnojoliishii naya oo'ulaain suulia noonoo'in sümaa nünüiki chi wanülüükai.

¹²O'yototoojo'o joolu'u chi wane aapieeka'iyä tü sulu'ukat tü iita najapulujutkat saa'u tü süchi miyo'usükat kanülüakat Eufrates. Osojoo müsia tü wüinkat süpüla anashinjatüin alataa napüleerua na sülaülashiikana mma chaje'ewaliikana wiinnaa.

¹³Te'arakalaka wane apünüinsüirua yolujaa süna'in müin aka saa'in eperü'üi, ojuittüsü wane

naanükülu'ujee chi kayuushikai, oo'ulaka wane naanükülu'ujee chi palajachikai wanülüü, chi kasipalakai nikiinain, oo'ulaka wane naanükülu'ujee chi chiiruajachikai wanülüü, chi e'ike'erüikai wayuu. ¹⁴Je na apünüinshiikana yolujaa, nountüin naa'inrüin kasa, maa aka tü nütüjakat apüleerua Maleiwa nümüüwa, shii'iree sünoujeein wayuu tü alawaa naküjakat sümüin. O'unüshii na yolujaakana nanainmüin napüshua na sülaülashiikana mma süpüla nakotchajiraain na wayuu namaajanakana süpüla atkawaa nümaa chi Maleiwa Pülashikai ma'i so'uweena tü ka'i kasalajaneetkat o'u saainjala wayuu sümüin.

¹⁵(Tayakai Juan, tamüshii paala jia: Müsü nünüiki chi Wasenyotsekai Jesucristo: “Jalia jia suulia motojuün jaa'in sünain teitaainjachin tachikua. Maa aka matüjaajuuin naa'u joujaleechin nüntüin wane ka'ruwarai, akaweechia tayakai tantapa. Je so'u ka'ikak tia, talateechi ma'i taya nümaa chi eekai een naa'in tapüla sünain naa'inrüin waneepia tü tachekekakat nüpüleerua. Nnojoleechi japülin nia tantapa”, nümakalaka.)

¹⁶Nakotchajinnakalaka na sülaülashiikana mma, je na wayuu namaajanakana, natüma na yolujaakana sulu'umüin wane mma kanüliasü süka pütchi hebreo, Armagedón.

¹⁷O'yototoojo'o joolu'u chi chiiruaaikai aapiee tü sulujutkat tü iita najapulujutkat yaa iipünaapünaa. Shiweetakalaka joo nünüiki Maleiwa emetut ma'i sulu'ujee tü a'waajüleekat eere nia joyotüin saa'u tü niinasekat,

sünain maa: “Kettaaitpa tatüma tü müliaakat süpüshua”, müshii nia. ¹⁸Sümachetaakalaka shiyaa juya sümaa sütüttaain sünain emetuluin ma'i. Akutkujaa müsia tü mmakat. Nnojotsü eewaajuün paalainka otta nnojotsü aapünaajünüin sütüma wayuu yaa saa'u tü mmakat süchiki eekai müin aka tüü. ¹⁹Je sükutkujaapa tü mmakat, ojunnajaasü mmolu'umüin tü pueulokalüirua sainküin mmakat süpüshua. Otta tü pueulo müle'osükat kanüliakat Babilonia, awakajaasü sünain apünüinsü sü'ülia. Süka jamüin, sotüsü naa'in chi Maleiwakai naainjala na kepiakana sulu'u. Üttashaatasü ma'i naa'in chi Maleiwakai noo'omüin. Süsalashiikalaka naya nütüma. ²⁰Je sükajee sükutkujaain tü mmakat, amouktaasü tü uuchikalüirua süpüshua. Oo'ulaka tü mmakalüirua pasanainsükat sünain palaa, emerojoosü shiinalu'umüin. ²¹A'ita müsia tü juyakat sünain kayeeloin saa'u wayuu. Müle'oyuu ma'i tü shiyeeloinkat, maa aka pienchi shikii ja'ralimüin “kilo” saawain. Otta na wayuukana, mojusü nanüiki nümüin Maleiwa süka müliashaatain ma'i naya sütüma tü ajütünakat nanainmüin.

Tü jierü aainjirapü'ükat kasa mojusü tü wayuukolüirua

17 ¹Nüntakalaka tanainmüin wane aapiee na'akajee na akaratshishiikana aapiee kajapulu'ukana iita sünain nümüin tamüin: “Jalaichi yaamüin tee'iyataiwa pümüin tü naa'inrüinjatkat chi Maleiwakai süpüla süsalainjatüin nütüma tü wayuu maa'insatkat ma'i, tü jierü

joyotokot sotpa'a süchi wainma. ²Na aluwataashiikana sainküin mmakat süpüshua, kaainjalashii naya süka nashatüin tü kasa mojusü saa'inrakat tü jietkat. Akaajaa tü manoujainsatkalüürua sainküin mmakat, kaainjalashii sünain nashatüin tü kasa mojusü saa'inrakat, süka saainjirapü'üin naya kasa mojusü", nümakalaka chi aapieekai tamüin.

³Shiasa mapa tia, nu'unitkalaka taya chi aapieekai süpümüin wane isashii sünain na'anaain taya chi Naa'inkai Maleiwa. Te'rakalaka saa'in wane jierü joyotüin naa'u wane wanülüü ishotoi. Je chi wanülüükai, akaratshisü nikii oo'ulaka poloosü nu'uwa. Je nütoutajee süpüshua, ashajünüsü wane anülieerua airu'ut nümüinjatü Maleiwa. ⁴Je süshe'in tü jietkat, jepisiiyaa je ishosü. Kanainsü ooro, tu'uma oo'ulaka kaa'ürüü. Je yaa sajapulu'u, eesü wane iita oorole'eya, piratsü ma'i tü kasa mojusü saa'inrapü'ükat. ⁵Eesü wane ashajuushi yaa shi'ipo'unain. Shia tü sünüliakat, matüjaajuu aa'ulu jamalu'ulüin. Müsü tü ashajuushikat mayaa: "Babilonia, tü pueulo kojutkat sütüma wayuu, tü shiikat süpüshua wayuu maa'insat, tü shikiisükat kasa mojusü saa'inrakat wayuu sainküin mmakat". ⁶Patatsü ma'i taa'in te'rapa tü jietkat, süka talatüin ma'i saa'in saa'u su'utuüin naa'in na anoujashiikana nünain Maleiwa saaliijee ichein naya nünain Jesús.

⁷Nümakalaka chi aapieekai tamüin: "¿Jamüsü patataka'a paa'in sütüma tü jietkat je nütüma chi wanülüü akaratshisükat nikii je poloosü nu'uwa? Taküjeertü

joolu'u pümüin sünain kasasüin wayuu tü jietkat otta chi wanülüü she'ejenakai. ⁸Chi wanülüü pi'rakai aa'in, kato'uchi nia paala. Je müshia maa'ulu yaa, ouktüshi. Otta so'u palitchon ka'i, ojuitteechi sulu'ujee tü Ishikat. Je süchikijee, ojütüneechi sa'akamüin tü siki matüjüinsatkat ayokujawaa. Je na wayuu manoujainsaliikana sainküin mmakat, poneechi ma'i naa'in chi wanülüükai ne'rapa nujuittüin sulu'ujee tü Ishikat sünain katüichipain no'u. Naya na nnojoliikana ashajünüin anülia sulu'u tü karaloukta kalu'ukot nanülia na wayuu ee'iranajaakana aa'in nütüma Maleiwa, na eetüjülüikana anülia sulu'u tü karaloukta sükumajaiwa'aya tü mmakat.

⁹"Tamüshi paala pia: Kasataalejese kekiin pia süpüla piyaawatüinjatüin saa'u kasain kayaawasein chi wanülüükai. Tü akaratshisükat nikii, shiyaawase akaratshisü namüna joyotokot aa'u tü jietkat. ¹⁰Otta shiyaawase shia'aya wane akaratshisü aluwataasürua. Na ja'raishiikana, maa'ulu yaa, nnojishii aluwataain süka ouktüinapain naya. Oo'ulaka wane, nia chi aluwataakai maa'ulu yaa. Oo'ulaka chi wane, meweetüinyü'iyaa süpüla aluwatawaa. Otta niweetapeena, aluwataweechi ne'e motso'o. ¹¹Otta müshia nüchikijee, aluwataweechi wane napüshi na akaratshishiikana. Niecechi chi wanülüü katakai o'u paala, chi ouktakai maa'ulu yaa, chi ojuittinneecheiki süpüla ojütünüinjachin mapeena sa'akamüin tü siki matüjüinsatkat ayokujawaa.

¹²“Je tü poloosükat nu'uwa pi'rakat, nayaawase polooshii wayuu aluwataashii. Nnojyülii o'ttüin sünnain aluwatawaa. Otta e'itaaneena naya mapeena süpüla aluwatawaa nümaa chi wanülüükai so'u palit ka'i ne'e. ¹³Wanaaweerü naa'in na polooshiikana sünnain jüüjüün naya nümmiin chi wanülüükai. ¹⁴Niasa chi wanülüükai oo'ulaka na polooshiikana aluwataashii, atkaajeena nümaa chi Anneetchonkai je na eekana nümaa. Otta chi Anneetchonkai, nüyamüleena naya. Süka jamüin, pülashi ma'i nia, chi kanüliakai chi Senyotkai Aluwataakai Pülashikai. Na eekana nümaa, naya na neenakakana, na nüneekakana, na ichekana nünnain”, nümmakalaka chi aapieekai tamüin.

¹⁵Je nümmakalaka joo tamüin chi aapieeka'ia: “Tü süchikalüürua eere joyotüin tü jierü maa'insatkat, shiyaawase wayuu eekat sainküin mmakat süpüshua je e'irukuukat süpüshua. ¹⁶Otta chi wanülüükai je na polooshiikana aluwataashii, naja'ttirüin tü pueulo kaainjaratkat kayaakuakat tü jietkat. Na'luwateerü süpüshua kasa sulu'ujee tü pueulokat. Yüütüüjeerü ma'i natüma. Je mala'aleejeeria shia natüma sümaa na'ajeerüin.

¹⁷“Nikeraajüinjatü Maleiwa tü naa'inrüinjattüjütkat naka na wayuukana. Tü naa'inreetkat na polooshiikana aluwataashii sünnain jüüjüün naya nümmiin chi wanülüükai, aleinjatü nütüma Maleiwa namüin. Aluwataajeena naya nümaa chi wanülüükai kettaaleepa'aya tü naa'inrüinjatkat chi Maleiwakai. ¹⁸Je tü jierü pi'rakat, shiyaawase tü pueulo müle'osükat,

tü kapümüinkat naa'in napüshua na sülaülashiikana mma sainküin mmakat süpüshua”.

Akjünüsü süchiki Babilonia sünnain sujutteerüin

18 ¹Shiasa süchikijee tia, te'rakalaka wane aapieeka'ia sünnain nüshakatüin chajee iipünaajee. Müle'oshi sünnain aluwatawaa chaa iipünaa. Warattuisü tü mmapa'akat nütüma süka nüntüshin nüma'anajee Maleiwa. ²Owoorolaashi nia sünnain emetuluin nünnüiki sünnain maa:

“Ajüttüsü tü pueulo kanüliakat Babilonia, tü kojutkat sütüma wayuu manoujainsat.

Yüütü'üleesia shia.

Shipiasü yolujaa ne'e, je shipiasü wuchii eekai nülerajüin Maleiwa.

³Na kepiapü'ükana cha'aya, kaainjaralii napüshua.

Nayouktüin chi Maleiwakai süpüla o'unaa süchüürua tü maleiwayaasükat natüma.

Je naainjirapü'üin kasa mojusü tü wayuukolüürua sainküin mmakat süpüshua süka tü maleiwayaasükat.

Na aluwataashiikana sainküin mmakat süpüshua, kaainjalashii naya wanaa namaa na kepiakana cha'aya sulu'u tü pueulokat. Je na oikkaalikana sainküinjee mmakat süpüshua, washinnuushii naya sünnainjee tü shiyalajakat tü wayuu sulu'ukot tü pueulokat noulia”.

⁴Taapakalaka joo nünnüiki Maleiwa chajee iipünaajee:

- “Jia tapüshikana, jujuitta
 jumaala chajee sulu'ujee tü
 pueulokat Babilonia,
 süpüla nnojoliinjanain
 jaa'inrüin tü kasa mojusükot
 makat aka tü saa'inrakat tü
 wayuukolüürua cha'aya,
 je süpüla nnojoliinjanain
 süsalain jia wanaajiraa
 sümaa süka tü müliaa
 antajatkat sünainmüin
 saaliijee saainjala.
- ⁵ Wattairü ma'i saalii tü
 saainjalakat to'upala.
 Shiimüin sünain nnojolüin
 motüin taa'in tü kasa
 mojusü saa'inrakat.
- ⁶ Anakaja müliale joolu'u tü
 pueulokat
 saaliijee saainjirapü'tiin kasa
 mojusü tü wayuukolüürua
 sainküin mmakat süpüshua.
 Anakaja müleka sülataleere
 müliaa sümüin
 saaliijee tü kasa mojusü
 saa'inrapü'ükat sümüin
 wayuu.
- ⁷ Maa aka koo'omüinpü'tiin
 talataa sümüin sütüma tü
 suwashirüinkat,
 anakaja müleka koo'omüinre
 joolu'u mojuu aa'in sümüin.
 A'waataapü'üsü shia sulu'u
 sukuaippa sünain maa:
 'Talatüsü ma'i taa'in maa aka
 wane sülaüla mma,
 nnojotsü müinya aka taya
 saa'in wayuu oukta
 a'wayuuset mojukat aa'in
 waneepia'.
- ⁸ Saalinjee tü saainjalakat, antalaa
 meerü müliaa sünainmüin.
 Je sütüma tü müliaakat,
 mojeerü ma'i saa'in tü
 wayuukolüürua cha'aya
 süka ouktüin süpüshi
 je süka alin jamü.
 Aja'lajaa meeria washirtüikat
 sütüma.
 Ta'ajireerü suulia süka
 pülashin ma'i tayakai chi
 Maleiwakai süsalakai atüma
 saainjala”.
- ⁹ Je na aluwataashiikana
 sainküin mmakat süpüshua, na
 kaainjalapü'ükana wanaa sümaa
 tü wayuukolüürua chakat Babilonia,
 na washinnuukana sünainjee tü
 saa'inrakat tü wayuukolüürua,
 a'yalajeena ma'i naya ne'rapa
 sümüsain tü pueulokat kaittataain.
¹⁰ Sha'wateena naya ka'yata suulia
 süka mmolüin seema sülanüin
 namüin tü alatakat sümüin tü
 pueulokat. Majateena naya sümaa
 mmoluu:
 “Aisha'ajaa, mülialeekalaja'a ma'i
 tü wayuukolüürua sulu'u tü
 pueulokat Babilonia,
 tü kojutpü'ükat sütüma wayuu
 wainma.
 Kama'ajaataayai shia
 saja'lajaapa”.
- ¹¹ Je na oikkaaliikana
 sainküinjeejanakana mmakat
 süpüshua, mojeerü ma'i naa'in saalin
 tü pueulokat süka nnojolüitpain
 jaralin ayalajüinjatüin noikkaain
 noulia. ¹² Nnojolüitpa jaralin
 ayalajüinjatüin ooro, pülaata, tu'uma,
 oo'ulaka kaa'ürüi. Nnojolüitpa
 jaralin ayalajüinjatüin tü kuluulu
 anashaatasü kanülüikat “lino”,
 oo'ulaka kuluulu kojutsü maa aka
 seera je kuluulu jepisiyyaa je ishosü.
 Nnojolüitpa jaralin ayalajüinjatüin tü
 wunu'u jemetakat sheejuu oo'ulaka
 tü kasa anasü akumajünakat süka
 su'uwa “elefante”, süka wunu'u
 eekai kojutüin, süka paira je

kachueera, oo'ulaka süka ipa eekai eeroljuushin. ¹³Nnojolüitpa jaralin ayalajüinjatüin tü she'ejúkat eküülü maa aka "canela". Nnojolüitpa jaralin ayalajüinjatüin tü wunu'u jemetakat seejuu sa'ajünapa, je tü wunu'u jemetakat eejut kanüliakat "mirra", je tü perfumekat. Nnojolüitpa jaralin ayalajüinjatüin wiino, seita, jaliina eekai anain ma'i, oo'ulaka "trigo". Nnojolüitpa jaralin ayalajüinjatüin paa'a, anneerü, je ama sümaa kareeta. Nnojolüitpa jaralin ayalajüinjatüin süchepchia wayuu je wayuu eekai süta'ünnün sünainjee atkawaa.

¹⁴Na oikkaaliikana sainküinjeejanakana mmakat süpüshua, meena naya: "Jiakana kepiakana sulu'u tü pueulokat Babilonia, aja'lajaaitpa süpüshua tü kasa anasü kachiiruakat jaa'in. Amüloutpa juulia tü washirüükat je süpüshua tü korolo kojutkat ma'i jütüma. Müiria nnojolüin jüntüin anain", meena naya ¹⁵sünain sha'washawaliin naya wattalu'u suulia, süka mmolüin naya seema sümaaayajüin naya. A'yalajeena ma'i naya sümaa mojuu aa'in süka nnojolüitpain jaralin ayalajüinjatüin noikkaain. ¹⁶Majateena naya:

"Alu'uleekalaja'a ma'i tü wayuukolüirua sulu'u tü pueulokat Babilonia, tü kojutpü'ükat sütüma wayuu wainma.

Kashe'inpü'üshii naya kuluulu anashaatasü kanüliakat 'lino' je tü kuluulu jepisiyaa je ishosü.

Kanainpü'üshii ooro, tu'uma oo'ulaka kaa'ürüi.

¹⁷Kama'ajaataayai saja'lajaapa nawashirüin".

Je na wayuu sülaülashiikana anua, oo'ulaka na a'yataashiikana nümüin sünain alü'tüjaa korolo shirokupünaa palaa sainküinjee mmakat süpüshua, oo'ulaka na o'unakana sulu'u anua, oo'ulaka napüshua eekai ne'ikajiraain korolo sulu'u wane anua süpüla oikkünaa, sha'washawaleena naya ka'yata suulia tü pueulokat. ¹⁸Je ne'rapa sümüsain tü pueulokat kaittataain, majateena naya: "Nnojotsü ein wane pueulo makat aka saa'in Babilonia sünain sülana'aleein ma'i sünain kojutüin sütüma wayuu", meena naya. ¹⁹Je nejiteerü mma nekiyuutajee shiyaawase mojuin ma'i naa'in sünain na'yalajüin sümaa maa:

"Aisha'ajaa, mülialeekalaja'a ma'i tü wayuukolüirua sulu'u tü pueulo kojutpü'ükat paala sütüma wayuu wainma, eere wantapü'üin sulu'u anua sümaa oikkaa korolo sümüin shii'iree washirüi. Kama'ajaataayai saja'lajaapa nawashirüin".

²⁰Taya, Juankai, tamüshii paala jia: Anakaja talatüle joolu'u jaa'in jüpüshua jia kepiakana chaa iipünaa nümaa Maleiwa, oo'ulaka jiakana anoujashiikana, jiakana Aluwataaushikana, otta jiakana nünüikimaajanakana Maleiwa, süka kasalajanaitpain nütüma Maleiwa sümüin tü pueulokat shi'rapü'üin wayümüin jümüin.

²¹Niweetakalaka joolu'u wane aapiee pülashi ma'i. Naapaakalaka joo wane ipa miyo'u ma'i, müsü aka saa'in tü amoliinajiakat "trigo", sünain nujutüin shia shirokümüin tü palaakat sümaa jashichishaatain ma'i nia sünain nümüin:

- “Babilonia, pia tü pueulo kojutkat wattashaata saalin chaa iipünaa eere paala sütüma wayuu, chi Maleiwakai sünain emetuluin meeria pia sümaa jashiee ma'i shia sünain maa: nütüma chi Maleiwakai
 nujuttitpeena pia.
 Miiiria pia maapajuuin anakaja wa'waajüle chi püchikua. Wamaleiwase Pülashikai ma'i, chi O'tte'erakai waya.
- ²² Miiiria pia maapajuuin 2 Shiimüin sünain lotüin ma'i maasi'ira pulu'u, nukuaippa müiria maapajuuin shi'ira sünain kasalajanain naainjala 'arpa', shi'ira konneeta, na wayuukana namüin oo'ulaka jayeechi. nütüma.
- Müiria ma'yataain pulu'u wayuu Kasalajanaitpa nütüma sümüin eekai natüjain süpüleerua saainjala tü jierü maa'insat akumajaa korolo eekai anain. kaainjaratkat Je nnojoleerü aapünüin sünainjee saainjirapü'üin shijijana moliina. kasa mojusü tü
- ²³ Müiria machuwajaajuuin wayuukolüirua sainküin rampara pulu'u. mmakat süpüshua. Je nnojoleerü aapünüin Pasalaashii na nüchepchiakana nasira na jekennuukana nütüma ka'wayuusein. süka tü jierü maa'insat Na ayalajüliikana pulu'u, o'utirapü'ükat naa'in".
- ³ Namakalaka nachikua sünain emetuluin: e'nnajünapü'üshii naya sünain washinnuuin sütüma wayuu wainma. “Aleluya, anakaja wa'waajüle chi Je na ouutshiikana chaa pulu'u, Maleiwakai. Naja'ttirüin tü pueulokat. naainjirapü'üin kasa mojusü tü wayuukolüirua sainküin Kaitteerü tü sümüsainkat mmakat süpüshua. waneepia”.
- ⁴ Otta na piamakana shikii 24 Süsalasü joo tü pueulokat pienschimüin laülaayuu je na su'utirapü'üin pienschishii kato'uchiikana, a'wachiraashii naya nümülatu'u chi Maleiwa joyotüshikai saa'u tü einaseekat sünain maa nümüin: nünüikimaajanakana Maleiwa “Amén, Aleluya, oo'ulaka wainma na anakaja wa'waajüle pia”. anoujashiikana 5 Shiweetakalaka joo wane pütchi oo'ulaka wainma wayuu sünain s'ütüpa'ajee tü einaseekat sünain mataasü aka saa'in shii'irain wayuu maa: “Anakaja müleka wa'waajüle chi A'waajünüshi Maleiwa saa'u sujuttüin Babilonia Wamaleiwasekai, jia a'yataashiikana nümüin, jia kojutkana atüma nia,

19 ¹ Shiasa kettaapa nüniiki chi aapieekai, taapakalaka wane mataasü aka saa'in shii'irain wayuu

jia e'nnaajünakana
sütüma wayuu, je na
me'nnaajuukana”.

**Wane talataa aa'in saa'u
ka'wayuusein chi Anneetchonkai**

⁶Taapakalaka joo wane mataasü
aka saa'in shii'irain wayuu
wattashaata saalin sünnain emetülüin
ma'i, müsü aka saa'in su'lotüin wüin
je sütürüla juya sünnain maa:

“Aleluya, anakaja wa'waajüle
chi Maleiwa Aluwataakai
Pülashikai ma'i
süka sülü'tülüin tü ka'i
ni'itaainjatkat o'u tü
aluwatawaakat nütüma.

⁷Anashi wa'waajüle nia süka
süpüshua waa'in
saa'u alana'aleeinya nia sünnain
pülashin.

Je anakaja müleka talatüle
waa'in,
süka süntüitpain nukalia
chi Anneetchonkai süpüla
ka'wayuusein nia.

Je tü nu'wayuuseinjatkat, yapasü
süpüla nümaain shia.

⁸Aapünüitpa sümüin tü
süshe'injatkat nütüma
Maleiwa,
tü kuluulu anasükat, tü
kanülüakat 'lino',
wane kuluulu kasuusü sümaa
wulein ma'i”.

(Je tü “lino” kanainjatkat, shia
shiyaawase tü kasa anasü
naa'inrapü'ükat na anoujashiikana
kataiwa'aya no'u.)

⁹Nümakalaka chi aapieekai
tamüin: “Anakaja püshajüle tüü:
Anata'aleeshija'a ma'i chi wayuu
eenajinnakai sünnainmüin tü
mi'iraa shikiirakat ka'wayuusein
chi Anneetchonkai”, müshi. Je

nümakalaka joo nüchikua tamüin:
“Shiimüin tüü, süka shiain nünüiki
Maleiwa”.

¹⁰Ta'wachiraakalaka joo
nümülatu'u chi aapieekai süpüla
ta'waajüinjachin nia. Otta
nümakalaka joo tamüin: “Puu'ulaa
suulia. Shia anaka alu'u müleka
niale Maleiwa pu'waajüin nümüiwa.
Tayakai, wane a'yataai ne'e nüümüin
Maleiwa maa aka piakai je maa aka
na puwalayuukana, na oonookana
sümaa tü shiimüin nikirajapü'ukat
anain Jesús, tü ekirajünakat anain
maa'ulu yaa natüma na aküjakana
nünüiki Maleiwa”.

**Akanajuushi chi wanülüukai nütüma
chi Nüneekajalakai Maleiwa**

¹¹Teirakaakalaka. Te'rakalaka
saa'in jutatüin chaa iipünaa eere chi
Maleiwakai. Eweeta müshia wane
ama kasuutai ma'i. Je nünülia chi
naajuchikai, “Lotokai Akuaippa”
münüsü. Lotüsü ma'i nukuaippa
sünnain kasalajanain saainjala wayuu
sümüin nütüma, je sünnain nütkaain
sümaa tü nü'tinüükalüirua. ¹²Otta
no'u, müsü aka saa'in süchuwala
siki. Je sünnain nikii, eesü wainma
kotse maa aka saa'in nakotse
na sülaülakana mma. Je eesü
wane anüliee ashajuushi nünain,
me'raajuusat sütüma wayuu. Nia
ne'e e'raajaka niakai nümüiwa.

¹³Je na'atüin wane kuluulu
ajüjüüshi süka isha. Je tü nünülia
e'nnaajünakat sütüma wayuu,
“Pütchi, Nünüiki Maleiwa” münüshi.

¹⁴Je na nusurulaatsekana,
ke'ejenajüshii naya ama kasuutannu.
Kashe'injashii naya kuluulu “lino”
anashaatasü, kasuusü je wulesü ma'i.

¹⁵Otta chi amaajuchikai, ojuittüsü
wane chajaruuta kasasü ma'i

naanükülu'ujee, tü nukanajeetkat aka na nü'ünüükana sainküin mmakat süpüshua. Je nuluwataapa saa'u wayuu, me'rujeechi amüin. E'itaaushi nia nütüma Maleiwa süpüla süsalainjatüin saainjala wayuu nütüma, chi Maleiwa jashichikai ma'i sümüin tü kaainjarannuukat. ¹⁶Otta sünain tü nüshe'inkat je nüpü'ünain, ashajuushisü nünülia mayaa: CHI SENYOTKAI ALUWATAAKAI PÜLASHIKAI.

¹⁷Te'rakalaka joo wane aapieeka'iya sha'watüin chaa naa'u chi ka'ikai sünain nuwooroloin sümüin süpüshua tü samutkalüirua chaa iipünaa sünain maa: “Jüshakata jumaala sünainmüin wane ekawaa müle'o ma'i yapasü jüpüla nütüma Maleiwa, ¹⁸jikaiwa asalaa, ne'iruku na aluwataashiikana, ne'iruku na sülaülashiikana surulaat oo'ulaka tü surulaatkalüirua, shi'iruku ama oo'ulaka tü amaajutkalüirua, je shi'iruku tü wayuukolüirua süpüshua, eekai achepchieein oo'ulaka eekai laülaain sümüiwa, eekai shi'nnaajuushin oo'ulaka eekai me'nnaajuuin”, nümakalaka.

¹⁹Te'rakalaka chi wanülüükai kasipalakai nikiinain namaa na aluwataashiikana sainküinjee mmakat süpüshua je na nasurulaatsekana. Outkajaashii naya süpüla natkaainjanain nümaa chi naajuchikai chi ama kasuutakai ma'i oo'ulaka na nusurulaatsekana. ²⁰Otta chi amaajuchikai namaa na nusurulaatsekana, nata'ülakalaka chi wanülüü kasipalakai nikiinain nümaale'eya chi wanülüü e'ike'erüikakai wayuu. Wanülüükakai chii, nia chi aluwataanakai paala sünain aa'inraa wainma kasa, maa

aka tü nütüjakat apüleerua Maleiwa nümüiwa, tü ni'ike'erakat aka tü wayuu e'itanaanakalüirua anain nejeetse chi wanülüü kasipalakai nikiinain, tü a'waajakalüirua tü niyaakuakat. Naairua piamale, ajutünüshii naya sünain katüin no'u shirokumüin tü sikikat makat aka saa'in laa eekai sa'ajünüin alu'u “azufre”. ²¹Je napüshua na aluwataashiikana oo'ulaka na nasurulaatsekana, o'utüna aa'inchii naya nütüma chi amaajuchikai süka tü chajaruuta ojuittakat naanükülu'ujee. Emirakalaka joo tü samutkalüirua sütüma ne'iruku.

Kapüshi chi Yolujaakai so'u 1.000 juya

20 ¹Shiasa süchikijee tia, te'rakalaka wane aapieeka'iya sünain nüshakatüin chajee iipünaajee. Najapüipasü shiyaawein shirouse tü Ishikat oo'ulaka wane kaleena miyo'u. ²Nüntakalaka nünainmüin chi kayuushikai süpüla nüta'ülüin nia, süpüla kapüinjachin nütüma süka tü kaleenakat so'u 1.000 juya. (Chi kayuushikai, nia chi wüi nümaiwajaikai, chi sülaülakai yoluja kanülüiakai Satanás.) ³Nujutünakalaka joo chi kayuushikai nütüma chi aapieekai sulu'umüin tü Ishikat. Je chi aapieekai, nüstülaajaain tü shirousekat nümaa süka wane kantaawa je ni'itaain wane ashajuushi sünain suulia sujutannüin. Nnojolüitpa e'ike'ennüin wayuu nütüma chi kayuushikai sainküin mmakat süka alawaa wane'ere'eya shikeraajapa tü 1.000 juya. Otta kettaapeena shia, ojuittinneechi nia süpüla taashinjachin so'u palit ne'e ka'i.

⁴Te'rakalaka wane einaseeirua, müsü aka neinase na sülaülakana

mma. Je na wayuu joyotakana saa'u, e'itaaushi naya nütüma Maleiwa süpüla aluwatawaa. Je te'riin na wayuu o'yotoonakana paala anutpünaa saaliijee aküjaa sümüin wayuu süna'in niain Jesús Nasenyotsein je saaliijee nanoujain nünüiki Maleiwa, na nnojliikana a'waajüin chi wanülüükai oo'ulaka tü niyaakuakat, na ayouktakana süpüleerua shi'itaanüin ne'ipo'unain oo'ulaka najapünain shiale tü nejeetsekat. Oso'iraitpa naa'in süpüla aluwatawaa wanaa nümaa Cristo so'u tü 1.000 juya.⁵⁻⁶ Naya palajanaka naa süna'in oso'irawaa aa'in nütüma Maleiwa. Anata'aleeshijja'a ma'i naya. Müina naya nnojliin ojütünüin sa'akamüin tü sikikat maa aka nojutünüinjanain na manoujainsaliikana. Nounteerü arütkawaa nünainmüin Maleiwa je nünainmüin Cristo chi Nüneekajalakai süpüla wanaawajiraain naa'in namaa je süpüla aluwatawaa waneepia nümaa Cristo so'u tü 1.000 juya. Otta na waneerua ouktüshiikana, wane'ere'eya süso'iraain naa'in shikeraajapa tü 1.000 juya.

**Tü alatajatkat nüka chi
Yolujaakai mapeena**

⁷Shiasa süchikijee keraapa tü 1.000 juya, ojuittinneechi Satanás sulu'ujee tü Ishikat eejachire paala püreesain, ⁸süpüla o'unaa sainküin mmakat süpüshua chamüinre'eya noumain Gog oo'ulaka Magog süpüla ni'ike'erüinjatüin tü wayuukolüirua süpüshua sümaa nükotchajirüinjatüin shia süpüla wane atkawaa. Watta ma'i saalii tü wayuukolüirua maatsü aka jasai sotpünaajatü palaa, isasü achikii shiyawajünüin.

⁹Nantapaatalakala wattajee sü'ülümüin Jerusalén, tü pueulo aisükat nüpüla Maleiwa, eere kepiain na nüpüshikana. Pasanainsü tü pueulokat nachiki. Otta süpülapünaa nashutüin saa'u tü pueulokat, anta müsia wane siki chajee iipünaajee nütüma Maleiwa süna'in saja'ttirüin naya. ¹⁰Je chi Yolujaakai, chi e'ike'erapü'ükai naya süka alawaa, ojütünüshi shirokümüin tü sikikat makat aka saa'in laa eekai sa'ajünüin alu'u "azufre", eere nujütünüin paala chi wanülüü kasipalakai nikiinain oo'ulaka chi wanülüü e'ike'erüikai wayuu. Mülieena naya sütüma tü sikikat waneepia so'uka'i je sa'wai süpüla juyakat süpüshua.

**Asakijünüsü nütüma Maleiwa
tü ouktüsükalüirua**

¹¹Te'rakalaka chi Maleiwakai joyotüin saa'u wane einasee kasuutot miyo'u ma'i. Yüütüüitaasü nütüma Maleiwa süchiki tü mmakat oo'ulaka tü kasakalüirua süpüshua chajkatkat iipünaa. ¹²Te'rakalaka joolu'u napüshua na wayuu ouktakana paala sha'washawalüin nümlätu'u chi joyotüshikai saa'u tü einaseekat, wayuu eekai shi'nnaajuushin sütüma wayuu oo'ulaka eekai me'nnaajuuin. Oso'iraitpa naa'in nütüma chi Maleiwakai süpüla nantüinjanain nümlätu'ümüin. Sujutannakalaka joolu'u wane karalouktairua süchikimaajatkat süpüshua tü naa'inrapü'ükat na wayuukana kataiwa'aya no'u. Ajutannataalasü joo wane karalouktaya, tü kalu'ukot nanülia na wayuu ee'iranajaakana aa'in nütüma Maleiwa. Asakijünüshii nütüma chi Maleiwakai wane'ewai

nakua napüshua na ouktüshiikana soo'opünaa tü kasa naa'inrapü'ükat kataiwa'aya no'u, eekat achiki sulu'u tü karalouktakalüirua. ¹³Tü wayuu eekai ouktüin paala shiroku tü palaakat, je tü wayuukolüirua sulujutkat tü Hadeskat, tü süpüleekat tü ouktüstüikalüirua, ojuttinnüsü nünainmüin Maleiwa süpüla asakinnaa nütüma. Nasakinnakalaka wane'ewai nakua napüshua nütüma soo'opünaa tü kasa naa'inrapü'ükat kataiwa'aya no'u. ¹⁴Je napüshuale'eya na e'itaanakana nütüma Maleiwa süpüla süsalaa naainjala, ojutünüshii naya sa'akamüin tü sikikat. Süchikijee tia, aja'ttüsü tü ouktaakat. Katateena naya nuulia Maleiwa süna'in mülieenain süpüla ka'ikat süpüshua sa'aka tü sikikat, ¹⁵eere nojutünüin napüshua na wayuu nnojoliikana anülia sulu'u tü karalouktakat kalu'ukot nanülia na ee'iranajaakana aa'in nütüma.

**Ee'iratünüsü kasa süpüshua
chaa iipünaa je yaa mmolu'u**

21 ¹Te'rakalaka saa'in süna'in shii'iratünüin kasa süpüshua chaa iipünaa je yaa mmolu'u. Akumajünüsü wane jeket shii'iraka süka aja'ttütütpain tü mmakat oo'ulaka tü palaakat oo'ulaka tü kasakalüirua süpüshua chajatkat iipünaa. ²Te'rakalaka wane Jerusalén jeket, tü pueulo aisükat nüpüla Maleiwa, süna'in süshakatüin chajee iipünaajee eejee chi Maleiwakai. Anashaatasü ma'i sukuaippa tü pueulokat, maa aka wane jierü a'anaaushikat nüpüla chi su'wayuuseinjachikai. ³Taapakalaka joo wane pütchi eejee tü einaseekat süna'in emetuluin ma'i süna'in maa:

“Eejeechi joolu'u chi Maleiwakai sümaa wayuu je kepiainjachi nia namaa. Nüpüshinjana naya. Eeinjachi nia namaa waneepia süka niain Namaleiwasein. ⁴Nümülialeena naya. Müiria nnojolüin ouktaa, mojuu aa'in, a'yalajaa, je saalii ayuulii, süka sülatütütpain süpüshua'ale makat aka tia”.

⁵Nümakalaka joo chi Maleiwa joyotüshikai saa'u tü einaseekat: “Anuu, jeketütütpa tatüma kasa süpüshua”, müshi nia. “Püshaja pümata tü tanüikikat süpüla kapülainjatüin saa'in wayuu shia süka shiimüin”, nümakalaka tamüin.

⁶Ayatshi joo nia aashajaain tamaa: “Kettaaitpa tatüma joo süpüshua tü te'itaatüjütütkalia paala süpüla müinjatüin. Taya kakumalaka kasa süpüshua, taya ekerajaakaa'aya shia. Chi wayuu eekai kee'ireein naa'in kataa o'u waneepia, teenajaain nia süpüla nünoujain tanain je süpüla eeinjachin nia tamaa masaloule süpüla ka'ikat süpüshua. ⁷Na eekai nayamülüin chi Kama'üiraikai, taapeerü namüin tü kataa o'u taküjütütpakat achiki. Tayeechi Namaleiwaseka, je nayeena tachooinka'aya. ⁸Otta na kaainjaraliikana, ojütüneena naya sa'akamüin tü siki makat aka saa'in laa eekai sa'ajünüin alu'u 'azufre'. Ojutüneena napüshua, makana aka na naa'uwakana saa'u anoujaa, na manoulakana, na yarüttakana aa'in, na o'unaliikana wayuwa'in, na a'luwajiraakana nakuaippa sümaa wayuu jierü otta wane jierü nümaa wane toolo, na ouutshiikana, na kamaleiwaseyaakana, je napüshua na aküjülüikana alawaa. Katateena naya toulia süna'in müliain naya sa'aka tü sikikat waneepia”.

Tü Jerusalén jeketkat

⁹Soo'opünaa tü Jerusalén te'rakat, müsü yaa: Arütkaashi tanainmüin wane aapiee no'ulukü na akaratskishii aapiee kajapulu'ukana paala tü iita kalu'ukot tü akaratskishükat müliaa, sünaain nümüin tamüin: “Jalaichi yaamüin tee'iyataiwa pümüin tü süpüleekat tü nüpüshikalüirua chi Anneetchonkai”, nümakalaka. ¹⁰Nu'unirakalaka taya saa'umüin wane uuchi müle'o ma'i, sünaain na'anaain taya chi Naa'inkai Maleiwa. Nii'iyatakalaka tamüin tü Jerusalén jeketkat, tü pueulo aisükat nüpüla Maleiwa, sünaain süshakatiin iipünaajee eejee Maleiwa. ¹¹Je süka een chi Maleiwakai yala sulu'u, warattuisü ma'i shia maa aka sümachera kakuuna eekai kojutshaatain ma'i, maa aka saa'in tü kakuuna kanüliakat “jaspe” jorottokat maa aka saa'in rouya.

¹²⁻¹³Yaletüsü ma'i iipünaamüin sükulaatse tü pueulokat. Poloostü piammüin so'u, apünüin wüinpejeeru'u, apünüin palaajeeru'u, apünüin uuchijeeru'u, je apünüin wopujeeru'u. Je so'ulu'u wane'ewai sükua, eeshi wane aapiee sha'watüin. Je sünaain tü so'ukot, ashajünüsü wane'ewai sükua sünaalia tü polookat piammüin ne'iruku na wayuu Israelkana. ¹⁴Je tü sükulaatsekat tü pueulokat, polootuasü piammüin tü süchechejiakat. Je ashajünüsü sünaain wane'ewai sükua nanülia na polookana piammüin Aluwataaushi e'itaanakana nütüma chi Anneetchonkai.

¹⁵Je chi aapieekai aashajaakai tamaa, kajapulu'ushi wane emirijia ooro'e'eya süpüla nimirijainjatüin

tü pueulokat, tü sükulaatsekat, oo'ulaka tü so'ukolüirua.

¹⁶Nimirijakalaka chi aapieekai tü pueulokat. Tü süpa'akat süpüshua, sulu'u uuchimüin, palaamüin, wopümüin, wüinpümüin, eesü maa aka 2.200 “kilómetro”. Je tü saja'apüinkat iipünaamüin, eesü maa aka 2.200 “kilómetro”. ¹⁷Je süchikijee, nimirijakalaka tü süka'lein tü sükulaatsekat. Eesü maa aka aippirua shikii ja'ralimüin “metro”. Je tü emirijia nüma'anakat chi aapieekai, müsü aka ne'e saa'in tü emirijia süma'anakat wayuu maa'ulu yaa.

¹⁸Je müsia tü sükulaatsekat, aainjuushi süka wane kakuuna kanüliasü “jaspe”. Oo'ulaka tü pueulokat, aainjuushi süka ooro anasü, jorottokalaka ma'i shia maa aka saa'in rouya. ¹⁹Je müsia tü polookot piammüin süchechejia yaakat suupünaa sükulaatse, anashaatasü ma'i süka aainjuushin sünaain kanain wane'ewai sükua kakuuna kojütüsü:

“jaspe”,
 “zafiro”,
 “ágata”,
 “esmeralda”,
²⁰“ónice”,
 “cornalina”,
 “crisólito”,
 “berilo”,
 “topacio”,
 “crisoprasa”,
 “jacinto”,
 “amatista”.

²¹Otta müsia tü shirousekalüirua tü polookat piammüin so'u, aainjuushi wane'ewai sükua süka wane kaa'ürüi. Je tü kaaye pasanainpünaakat sünaain tü pueulokat, aainjuushi süka ooro

anasü, jorottokalaka ma'i shia maa aka saa'in rouya.

²²Nnojotkalaka te'ruün wane a'waajülee chi Maleiwakai chaa sulu'u tü pueulokat. Nnojotsü che'ojaain süka eenjachin chi Maleiwa Aluwataakai Pülashikai ma'i oo'ulaka chi Anneetchonkai waneepia sulu'u tü pueulokat. ²³Je nnojotsü che'ojaain nuwarala chi ka'ikai je nuwarala chi kashikai, süka warattuün ma'i tü pueulokat nütüma chi Maleiwakai je süka chuwtuün shia nütüma chi Anneetchonkai. ²⁴Tü wayuukolüürua sainküünjee mmakat süpüshua, suwaralaapeena tü pueulokat. Je na aluwataashiikana sainküün mma, nantireerü tü nawashirüinkat sulu'umüin tü pueulokat. ²⁵Je süka nnojoleerüin tü piyuushikat cha'aya, jutateerü tü so'ukat tü pueulokat waneepia sa'wai je so'uka'i. ²⁶Je antinneerü sulu'umüin tü pueulokat wainma kasa anajüsü sainküünjee mmakat süpüshua. ²⁷Nnojoleerü ekerotinnüin sulu'umüin tü pueulokat kasa eekai nülerajüin Maleiwa, maa aka na eekai naa'inrüin kasa mojusü sünain a'waajaa maleiwayaasü oo'ulaka eekai naküjain alawaa. Nayeena ekerotka namüüwa na wayuu ashajünakana anülia sulu'u nükaralouktase chi Anneetchonkai, tü kalu'ukot nanülia na wayuu ee'iranajaakana aa'in nütüma Maleiwa.

Tü wüin katakat atüma so'u wayuu

22 ¹Nii'iyatakalaka tamüin chi aapieekai wane süchi jorotto'ulu ma'i, maa aka saa'in rouya, tü katakat atüma so'u wayuu. Kekiüsü eejee niinase chi Maleiwakai

je chi Anneetchonkai. ²Palatüsü tü süchikat pasanainpünaa sünain tü kaaye pasanainpünaakat sünain tü pueulokat. Je sotpünaa tü süchikat sulu'u piamale sa'ata, eesü tü wunu'ukalüürua katakat atüma so'u wayuu. Kachonsü kashiwai. Otta tü süpanakat, ayatüsü sünain anain tü wayuukolüürua cha'aya sütüma. ³Je yala sulu'u tü pueulokat, nnojotsü kasain nülerajüin Maleiwa.

Tü eekat sulu'u tü pueulokat, shia niinase chi Maleiwakai oo'ulaka chi Anneetchonkai, eere na'waajüünün natüma na anoujashiikana, ⁴na e'reenakana nu'upünaa, na kanainkana nünülia ne'ipo'unain. ⁵Nnojoleerü piyuushi cha'aya. Je nnojoleerü che'ojaain namüin suwarala rampara je nuwarala chi ka'ikai, süka warattuuleerüin tü mmapa'akat nütüma chi Maleiwa Aluwataakai. Je aluwataajeena na anoujashiikana wanaa nümaa waneepia süpüla ka'ikat süpüshua.

Eitaajeечи Jesús nüchikua

⁶Nümakalaka chi aapieekai tamüin: “Shiimüin ma'i süpüshua tü pütchi aküjünüitpakat pümüin. Kapüleesüja'a saa'in wayuu shia. Süka jamüin, chi Maleiwa Aluwataakai, nüjütüin chi aapieekai pünainmüin maa aka nüjütüin paala chi Naa'inkai nanainmüin na nünüikimaajanakana, sünain aküjaa namüin na nüpüshikana süchiki tü kasa alateematüitpakat”, nümakalaka chi aapieekai tamüin.

⁷Müshi Jesús: “Jaapa jumaala tanüiki. Eitaamaateechi taya tachikua. Anata'aleeshiija'a ma'i na wayuu eekai noonoin sümaa tü ashajünakat achiki sulu'u tü karaloukta süchikimaaajtkat tü kasa alateematüitpakat”.

⁸Tayakai Juan, taya akijünaka amüin, taya ee'iyatünaka amüin süpüshua tü ashajünakat yaa sulu'u tü karalouktakat. Shiasa süchikijee kettaapa taapüin je te'rüin shia, ta'wachiraakalaka nümülatu'u chi aapiee ee'iyataakai tamüin shia süpüla ta'waajüinjachin nia. ⁹Otta nümakalaka joo tamüin: “Nnojo paa'inrüin tüü. Nia Maleiwa pu'waajüinjachika nümüiwa. Tayakai, wane a'yataai ne'e nümüin Maleiwa maa aka piakai je maa aka na puwalayuyukana, na akijüliikana nünüiki Maleiwa, je maa aka napüshua na oonookana sümaa tü ashajünakat sulu'u tü karalouktakat”, nümakalaka tamüin.

¹⁰Ayatshi aashajaain chi aapieekai tamüin sünnain maa tamüin: “Nnojo punujulajüin saa'u tü pütchi sulu'ukot tü karalouktakat, süchiki tü kasa alateematüitpakat, süka sülü'ülüin sükalia süpüla shikeraajüinjatüin. ¹¹Je süka sülü'ütchoin ma'i tia ka'ikat, eeshii süpüla nantu'ulaain aa'u na wayuu kaainjaraliikana, na yarüttakana aa'in, sünnain ayatüin sünnain aa'inraa tü mojusukat. Otta na aa'inrakana waneepia tü anasü nüchekakat Maleiwa napüleerua, antuujeeena aa'u sünnain aa'inraa tü anasukat”, nümakalaka chi aapieekai tamüin.

¹²Müshi Jesús: “Jaapa jumaala tanüiki. Eitaamaateechi taya tachikua. Anteechi taya süpüla tawalaajüin wayuu je süpüla süsalainjatüin wayuu tatüma tü kasa saa'inrapü'ükat kataiwa'aya so'u wane'ewaare süka.

¹³Eetüjü'iyaa taya süpülapünaa tü kasakat süpüshua je eenjachi taya meinshi. Taya kakumalaka kasa

süpüshua, taya ekerajaka'aya shia”, müsülee nünüiki Jesús.

¹⁴Alana'aleejeenia ma'i sümaa talatüin ma'i naa'in na alatinnakana oulia naainjala nütüma Maleiwa. E'itaaushinapa naya nütüma Maleiwa süpüla nekerolüin sulu'upünaa so'u tü pueulokat süpüla neküinjatüin süchon tü wunu'u katakat atüma so'u wayuu. ¹⁵Otta müshi'iyaa na wayuu malatirujukana oulia naainjala, nnojoleena ekerolüin naya. Naya na wayuu yarüttakana aa'in, maa aka na ouutshiikana, na a'luwajiraakana nakuaippa sümaa wayuu jierü otta wane jierü nümaa wane toolo, na o'unaliikana wayuwa'in, na a'waajakana maleiwayaa, oo'ulaka na akijüliikana waneepia alawaa.

¹⁶Müshi Jesús tamüin: “Taya Jesúska'aya, taya nuu'uliwo'uka'aya David, chi sülaülakai mma paala sümaiwa. Maa aka tü jolotsü eweetakat eeiwa'aya ai, akaajaa tayakai sünnain tee'iyatüin tü nüchekakat Maleiwa sümüin wayuu wainma. Tamüshi paala pia: Süpüshua tü akijünakat pümüin nütüma chi aapiee tajütakai pünainmüin, napülatü na anoujashii sulu'ukana tü outkajaaleekalüirua”, müsülee nünüiki Jesús tamüin.

¹⁷Chi wayuu eekai kee'ireein naa'in kataa o'u waneepia, anakaja nünoujüle nünain Jesús süpüla eenjachin nia nümaa masaloule süpüla ka'ikat süpüshua. “Jalaina”, müshi chi Naa'inkai Maleiwa. Maja'a aka nanüiki na anoujashiikana, na kanüliakana nu'wayuusein chi Anneetchonkai: “Jalaina”, müshii. Je na wayuu aapakana tü ashajünakat sulu'u tü

karalouktakat, anakaja namüleya:
“Jalaina”.

**Nüchiajaain Juan na aapakana
sünüiki tü karalouktakat**

¹⁸Tayakai Juan, tamüshii paala jia jüpüshua aapakana joo tü pütchi tashajakat sulu'u tü karalouktakat, süchiki tü kasa alateematüitpakat, suulia ju'wanaja'alaain tü pütchikat: Chi eekai nukoo'omüinjain tü pütchi sulu'ukot tü karalouktakat, süsaleechi nütüma Maleiwa süka tü müliaa aküjünakat achiki sulu'u tü karalouktakat. ¹⁹Oo'ulaka chi wayuu eekai nunujulajüin süpüshi tü pütchi sulu'ukat tü karalouktakat, nuu'ule'ereechi Maleiwa suulia ekeroloo sulu'upünaa so'u tü pueulokat

süpüla niküinjachin süchon tü wunu'u katakat atüma so'u wayuu, tü aküjünakat achiki sulu'u tü karalouktakat.

²⁰Nütüjaa aa'ut Jesús sünaain shiimüin süpüshua tü tashajakat achiki jümüin jia anoujashii sulu'ukana tü outkajaaleekalüirua. Je nünüiki jümüin: “Shiimüin sünaain teitaamaateechin tachikua”, müshi nia jümüin.

Je tamakalaka ni'ipajee: “Senyotkalee Jesús, anakaja püle'ejüle maalü. Amén”.

²¹Je süma'inru'u wa'atapajüin chi Wasenyotsekai Jesús, tachuntüin nümüin süpüla naapüinjachin na'anasia waneepia jümüin jia anoujashiikana jüpüshua. Kettaasü joolu'u tü tashajakat jümüin. Amén.